

# المداولة بعد الحكم أحياناً

مسرحية من ثلاث مداولات

تأليف

ممدوح فهمى

تقديم

فتحى العشرى

وزارة الأفاضة



سلسلة شهرية تنشر النصوص المسرحية الطويلة  
لختلف الأجيال وتحى حركة النقد بدراسات نقدية

### • هيئة التحرير •

رئيس التحرير  
أبو العلا سلاموني  
مدير التحرير  
الحسيني عمران  
سكرتيرة التحرير  
منى عبد الستار

الآراء الواردة في هذا الكتاب لا تعبر بالضرورة عن توجه الهيئة  
بل تعبر عن رأى وتوجه المؤلف فى المقام الأول.

• حقوق النشر والطباعة محفوظة للهيئة العامة لقصور الثقافة.  
• يحظر إعادة النشر أو النسخ أو الاقتباس بأية صورة إلا بإذن  
كتابى من الهيئة العامة لقصور الثقافة، أو بالإشارة إلى المصدر.

### سلسلة

### نصوص مسرحية

تصدرها

الهيئة العامة لقصور الثقافة

رئيس مجلس الإدارة

سعد عبد الرحمن

أمين عام النشر

محمد أبو المجد

الإشراف العام

صبحى موسى

الإشراف الفنى

د. خالد سرور

• المدولة بعد الحكم أحياناً

• ممدوح فهمى

• الطبعة الأولى

الهيئة العامة لقصور الثقافة

القاهرة - 2011 م

160 ص. 13.5 × 19.5 سم

• تصميم الغلاف:

عماد عبد الفنى

• المراجعة اللغوية: اشرف عبد الفتاح

سعاد عبد الحليم

• رقم الإيداع: ٢٠١١/١٩٨٤٧

• المراسلات:

باسم / مدير التحرير

على العنوان التالى: ١٦ شارع أمين

سامى - القصر العيسى

القاهرة - رقم بريدى 11561

ت 27947891 (داخلى، 180)

• الطباعة والتنظيد:

شركة الأمل للطباعة والنشر

ت 23904096

## المدولة بعد الحكم أحياناً



## تقديم



## المفهوم الآخر للمداولة

من المتعارف عليه والمألوف.. أن الاحكام لا تصدر الا يعد  
المداولة.. لكننا هنا امام حالة مغايرة لما استقر الرأى عليه تماماً .  
فالكاتب فى تلك المسرحية قد وضعنا كمتلقن أن نتداول فيما  
بيننا بعض ما يصدر من احكام كرويا اخرى للبحث عن العدالة .  
تلك الرؤيا تجعلنا نقر بإمكانية ضياعها عن غير قصد أو  
التقصير فى الاطلاع على كل جوانب الصورة.. والعذر هنا ان من  
نحتكم اليه هو بشر مثلنا.. والبشر دوماً ليسوا بمعصومين  
ولنتابع .

المداولة الأولى: بلا عنوان وتدور بين بيت يجمع الأب والأم والابنة والخطيب ومحاكمة أبرز من فيها القاضى.. قتل الأب بدون أسباب حقيقية ولا دوافع، وإتهم الخطيب بقتله، مما أثار ضده الخطيبة ابنة القتل وكذلك زوجة القتل.. وهنا يتجه المؤلف الى الفانتازيا أحياناً والعبث أحياناً أخرى، بعيداً تماماً عن الواقعية، بداية من الديكور الذى يضم فى مشهد واحد مقسم إلى أركان بحيث تسلط الإضاءة إلى الركن الذى يدور فيه الحوار وتنحسر عن الأركان الأخرى.. فتوجد منصة القضاء وقفص الإتهام فى ركن، ومائدة الطعام وأريكة صالون فى ركن آخر، ومكتب التحقيق فى ركن ثالث، وزنزانة فى ركن رابع، وطاولة فى محل تجارى فى ركن أخير.

أما الفانتازيا فتتمثل فى القتل الذى يظهر فى شخصية الدفاع عن المتهم، بحيث يطالب ببراءته ويؤكد- كقتيل سابق - أن المتهم لم يقتله.. وأما العبث فيتمثل فى رفض القاضى طلب «دفاع القتل» أو شهادة القتل نفسه، والتماهى فى العبث يتمثل فى ظهور القتل وهو يستنكر المطالبة ببراءة المتهم، تلك المطالبة التى طالب بها هو نفسه من قبل.. وتعود إلى الفانتازيا والعبث معاً، عندما نشاهد القاتل وهو يعتلى منصة القضاء، بدلاً من القاضى، يبرىء المتهم أو يبرىء نفسه..

المداولة الثانية: بلا عنوان أيضاً، وتدور بين الأم وبين الأب، فهما منفصلين كل له حياته بعيداً عن الآخر، بينما الابنة حائرة مشتتة



بينهما وبين بيت مخدومها، وهذا البيت يمثل الديكور الثالث.. وهى ديكورات منفصلة ولكن فى مشهد واحد، يحدد المشهد ما يدور فيه من حوار كلما أضىء.. الابنة تعانى من معاكسات ابن مخدومها التى تصل إلى حد محاولة اغتصابها، وعندما تتجه الأم والأب تشكو إليهما، يستنكران شكواها ويدفعانها إلى العودة لعملها غير مبالين بما يمكن أن يحدث لها.. وعندما يضيق بالابنة تقتل الشاب لتفלט من الإغتصاب ومن العار فى الوقت نفسه، علماً بأنها تدافع عن مشرفها أولاً وأخيراً..

لكن القاضى يكون له رأى آخر، هو إيداع الفتاة دار الإصلاحية لعدم بلوغها السن القانونية، رغم مواجهة الفتاة له، وقولها «لو كان حصل اللى البك عايزه، ياترى كان حايبقى مكانى ويتحاسب زى ما أناما إتحاسبت، ولا كان لازم أضيع بدل ما أدافع عن شرفى وشرف أهل ما يشرفوش».. ونسيت الفتاة أن تقول للقاضى «لو كان ده حصل لبنتك كنت حتحكم عليها الحكم نفسه»..

المهم أن الحكم صدر قبل المداولة فى هذا الجزء من المسرحية أو السهرة، كما أن الواقعية لم تدع قصة للفانتازيا أو العبث للتدخل فى الأحداث التى تقع كل يوم ولا غرابة فيها على الإطلاق، بل يحدث ما هو أعجب وأبشع، يحدث أن الزوج يقتل زوجته، والزوجة تقتل زوجها، والابن يقتل أهله أبوه وأمه وأخوه وأخته، والابنة ترتكب

الجرائم ذاتها، والأب يقتل أولاده والأم ترتكب الجرائم ذاتها، وخارج نطاق القتل، يحدث ما هو أبشع، يحدث أن يتحول الأب إلى قواد لبناته وزوجته، وتتحول الأم إلى قواد لبناتها، كما يحدث أن يبيع الزوج زوجته لمن يدفع أكثر وأكثر من مرة، ويبيع الأهل الأبناء، ويحدث أخيراً أن يتبادل الأزواج الزوجات وتتبادل الزوجات الأزواج، ويعاشر الرجل أكثر من امرأة بدون زواج، وتعاشر المرأة أكثر من رجل بدون زواج، بل تعاشر الزوجة أكثر من رجل بدون زواج، وأيضاً بالزواج. كل هذا يحدث بمنتهى الواقعية، وبدون فانتازيا ولا عبث!

المادولة الثالثة: بلا عنوان كذلك، وتدور بين قاعة محكمة تضم منصة القضاء ومقعد ممثل الإدعاء، وفي جانب آخر مقاعد الجمهور، بعضها فاخر (ومع هذا كتب عليها عبارة: الناس الغلبة) والبعض الآخر لا قيمة له، (ومع هذا كتبت عبارة: الناس المفترية) أما الركن الثالث ففيه قفص الاتهام على شكل قفص عصفور كبير يتسع لرجل واحد..

وهنا نلاحظ أن الديكور ذاته يختلف عن ديكورات المداولتين السابقتين، فهو ديكور يوحي منذ الوهلة الأولى بالفانتازيا والعبث، ولا ينتمى أبداً إلى واقعية المداولتين الأولى والثانية رغم ما فيها من فانتازيا وعبث وواقعية.. في بعض الاحيان

وننتقل من الديكور إلى الملابس فنذكر الإغراق فى الفانتازيا،  
فالمتهم رث الثياب - وهذا جائز - والجندى يرتدى الأسموكنج -  
وهذا غير جائز - ثم ننتقل إلى الشخصيات، فنذكر الإغراق فى  
العبث، فالمحامى يتهم موكله ويدينه - وهذا غير جائز - بل يتهمه  
بغير الحقيقة - وهذا لا يجوز على الإطلاق.

ثم نصطدم بما يسمى الإغراق فى الفانتازيا واللامعقول، عندما  
نشاهد القضاة يظهرون بأقنعة القرصان ودراكولا ومهرج السيرك  
وممثل الإدعاء يظهر فى هيئته الإنسان الأول..

ومع هذا يصدر الحكم - بعد المداولة - بإعدام المتهم وخروجه  
فى جنازة لا يسير فيها غير الشحاذين وجنود الأمن المركزى..  
أما ما يدعو إلى الضحك حقاً، فهى التهمة الموجهة لهذا المواطن  
والتي اعتبرتها المحكمة جريمة يعاقب عليها القانون، فقد أطلق هذا  
المواطن المدعو بلاص بن زلعة بن ماجور المدألج، على ابنه خيشة  
اسم شريف، وهو اسم رجل أعمال شهير يشكو تضرره من هذه  
الفعلة الشنعاء التى تلوث شخصه وتسئ إلى سمعة عائلته.. ولهذا  
حكم على هذا المعدم المتجرئ بالإعدام..

وتعود إلى الفانتازيا والعبث واللامعقول معا فى نهاية هذه  
المداولة الثالثة، فنجد أن الجميع، هيئة المحكمة والإدعاء والجمهور،  
قد تجمدوا كالتماثيل فيما عدا المتهم الذى يخرج من القفص

ليتساءل: «هى الحكاية كانت حلم والا الحلم هو الحكاية.. بس الحلم ده ساعات بيحصل..»

إلا أن كلمة المتهم الأخيرة أو كلمة المؤلف فتعارض أو تتعارض تماماً مع كل الأساليب المستخدمة فى المداولات الثلاث، فنحن هنا أمام أسلوب يتجه بالمباشرة والسعى وإشراك الجمهور أو محاولة إشراكه على طريقة بريخت..

لقد حاول المؤلف أن يجمع فى مداولاته الثلاث بين الأساليب المسرحية جميعاً، وهى محاولة ولاشك جديدة وجريئة معاً!

**فتحى العشرى**

المداولة بعد الحكم أحياناً



## إهداء

إلى.. من كان لوجودها بجانبى الفضل فى أن أكون  
وأصبحت بعد رحيلها أتساءل من أكون؟  
زوجتى ورفيقة عمرى  
لها الرحمة والمغفرة

م.ف





## المدافلة الأولى



## المنظر

« يلاحظ أن الديكورات فى هذه المسرحية لها تنسيق خاص يساعد على طريقة صياغة العرض من وجهة نظر المتهم فالحدث المسرحى ينتقل من ديكور إلى آخر دون توقف لاعتماد المسرحية على التتابع السريع . وعلى ما تقدم فإن الديكورات متناثرة على خشبة المسرح ويرتبط كل منها مع ( اسبوت لايت ) خاص بها ليضىء فى الوقت المناسب مع كل حدث . ويترك هنا للسيد المخرج مع مصمم الديكور اعداد الديكورات الرمزية المناسبة للموقف وفى الأماكن المناسبة للحركة والديكورات معا :

- منصة قضاء مع قفص الاتهام.

- مائدة طعام صغيرة.

- مكتب للتحقيق.

- أريكة من صالون.

- زنزانة للسجن.

- طاولة فى الخلل التجارى.

ويبقى أخيراً أن نشير إلى أن ملابس المتهم لا تتغير طوال العرض المسرحى وهى ملابس الإعدام. أما ملابس الشخصيات الأخرى فإنها تتغير لتناسب المواقف والأحداث. وايضا فإن النص المسرحى سيقصر فيما بعد على ذكر المكان والحوار والشخصيات فقط».

## المشهد الأول المحكمة

(يسلط الضوء على منصة القضاء الحالية تماما .. من  
القاضى ومن المستشارين وهناك فى قفص الاتهام يقف  
(صلاح) المتهم وهو يتطلع إلى منصة القضاء الحالية) ..  
من / القاضي: حكمت المحكمة حضوريا بإحالة أوراق المتهم صلاح  
الدين فتوح إلى فضيلة المفتى ..

مـصـلـاح: (صارخا) لأ ..

من / القاضي: رفعت الجلسة ..

مؤثرات: (أصوات تصفيق حاد وكذلك تصفير الاعجاب  
ويتحول هذا الخليط المزعج بعد ذلك إلى شكل  
منظم من التصفيق والهتاف كما يحدث فى  
مباريات كرة القدم) .

ص / المجاميع : هو .. هو .. اعدموه .. هو .. هو اشنقوه ..

( يتبعد الأصوات ) ..

( عيون المتهم صلاح تتابعها فى حركة ) ( بانتومايم )

وكانها تتجه نحو الجمهور ) ..

صلاح : اسمعونى من فضلكم ..

ص / القاضي : انت قلت كل حاجة ..

صلاح : ( وهو يلتفت نحو المنصة فى حدة ) طيب ليه مش

عاوزين تصدقونى ؟

ص / القاضي : الجريمة ثابتة عليك .. كل الادلة والشهود وتقرير

الطبيب الشرعى اثبتوا انك قتلت الحاج مختار ..

صلاح : حد يقتل ابوه ..

ص / القاضي : انت الى بتسألنا ..

صلاح : انا من حقى ادافع عن نفسى ..

ص / القاضي : الادلة أكبر من دفاعك ..

صلاح : لا .. انا لا يمكن اكون قاتل .. ولو كنت قاتل لايمكن

اقتل الحاج مختار .. انتوا لو تعرفوا ايه معنى الحاج

مختار بالنسبة لى .. استحالة حد فيكم يشك لحظة

فى إنى أقتله .. مستحيل أقتله .. مستحيل ..

**إظلام وانتقال بالضوء للمشهد الثانى**

## المشهد الثانى غرفة الطعام

(سلوى ابنة القليل مختار تطالع جريدة الصباح  
وهى تجلس إلى مائدة الإفطار حيث يجلس مختار  
(الأب القليل) كما تجلس الأم بجانبه وتبدو عليهم  
جميعاً السعادة).

**مختار:** ماتا كلى يا سلوى ..

**سلوى:** أخيراً مسكوه ..

**الأم:** (وهى تنظر إلى الحاج مختار فى تعجب) مين اللى

مسكوه ده يا حاج ؟ ..

**سلوى:** المتهم ..

**الأم:** متهم مين ؟ ..

**سلوى:** اللى قتل الراجل ..

**الام:** راجل مين وست مين .. ما تسيبك من البلاوى دى  
وتفطرى ..

**مختار:** استنى بس يا أم سلوى .. دى قصدها على التاجر  
اللى اتقتل من شهرين ..

**سلوى:** بالضبط يا بابا .. اسمع كده .. **(تقرأ)** ورغم  
اختفاء القاتل طوال هذه المدة إلا أن البوليس كان  
يتتبع أثره فى كل الاماكن التى يحتمل ان تكون  
وكراله .. وبالفعل تم القبض عليه فى إحدى الملاهى  
الليلية بصحبة الراقصة ( ن . ع ) ..

**الام:** ينيلها ( ن . ع ) دى .. ومالقتيش غير قتال القتلة ده  
وتحبه ..

**مختار:** تحب مين يا ام سلوى .. دى بتحب القرشين اللى  
سرقهم ..

**الام:** اياك بقى يكونوا مسكوها هى كمان ..

**سلوى:** لأ .. دول أدخلوا سبيلها بعد التحقيق .. لانها بحكم  
القانون شاهده ..

**الام:** فضينا من الكلام ده واطلعى شوفى صلاح اتأخر  
ليه ..



**سلوى:** (تهدو عليها السعادة وهي تطوى الجرنال وتلقى به  
فى حركة سريعة ماضية للخارج) حالا هاجبيه لو  
حتى بالبوليس .

**الام:** (بعد خروج سلوى تماما) باقول إيه يامختار؟ ..

**مختار:** خير ..

**الام:** انت صحيح عقدت العزم على إنك تجوز سلوى  
لصلاح؟ ..

**مختار:** ما الكلام ده انتهيينا منه من زمان

**الام:** هو صحيح ابن حلال .. وبقي زى ابننا .. بس  
يعنى ..

**مختار:** بس يعنى ايه .. هى الحكاية لما دخلت فى الجد  
هانبدأ نفكر من جديد ..

**الام:** يا حاج انت عارف ان الناس ما بترحمش ..

**مختار:** يعنى لا هايبقى رحمة من الدنيا .. ولا رحمة من  
الناس .. عاوانا احنا كمان نعاقبه على اللى  
حصله .. موش ده الطفل المسكين اللى لاقيناه تايه  
فى الشارع ويوميها قعدتى تبكى وقلتى انه هايكون  
ابنك البكرى لو ماطهرلوش اهل يسألوا عليه ..  
موش ده اللى جالنا وجاب معاه الخير وربنا رزقنا

على وشه .. موش ده اللي عشتى طول عمرك تقولى  
يا ريت أشوقه راجل واخطب له واجوزه وافرح  
بيه .. قوللى ايه اللي اتغير .. قولى ..

**الام:**

قوللى انت يا حاج انا قلت ايه استاهل عليه  
التقظيم ده كله .. انت يعنى هستحبه قد انا ما  
حيته .. ده انا اللي سهرت بيه الليالى وشلت همه  
من يوم ما دخل البيت .. انا ولا موش انا ؟!

**مختار:** امال ليه بتقولى الكلام ده دلوقتى ؟!

**الام:** الخوف ..

**مختار:** الخوف ؟ ..

**الام:** ايوه الخوف .. الخوف على بنتنا الوحيدة .. والخوف

عليه هو كمان . موش جايز بييجى يوم وكلام الناس  
يضيع المحبة والود اللي بينهم ويرجع اخوك عند  
ابوك وكل حى يروح لحاله ..

**مختار:** لا صلاح ولا سلوى حد فيهم هايسمع غير اللي فى

قلبه .. الايام اللي فاتت اكدت انهم متفاهمين ومش  
ناقصهم حاجة لسه هايعرفوها عن بعض أو يتفاجأوا  
حتى بيها .. كده ولا موش كده .. ؟

**الام:** كده ..

**مختار:** يبقى ايه اللي مخوفك من جوازهم؟..

**الام:** (فى استسلام) ولا حاجه.

**مختار:** لا.. كلام فض المجالس ده انا محبوش.. سلوى زى

ماهى بنتك بنتى انا كمان.. ولازم اسمع اللي فى قلبك ومو غوشك.

**الام:** (بنفس الطريقة السابقة) مشيها..

**مختار:** من قلبك...؟

**الام:** من قلبى.. انا بس زى ما تقول كده كنت بجسك..

ان جيت للحق البنت بتحبه قوى وهما الاتنين لايقين لبعضيههم..

**مختار:** يبقى نتجه لربنا ونقول الف مبروك..

(صلاح يدخل فى صحبة سلوى وهى تمسك بيده ويبدو عليها منتهى السعادة).

**صلاح:** صباح الخير يا بابا.. صباح الخير يا ماما.. ازيكم النهاردة..

**مختار:** عال.. بس أم سلوى زعلانه منك وواخده على خاطرها..

(الأم تنظر مختار فى قلق وهى تمسك بيد صلاح لتجلسه بجوارها فى الوقت الذى يقوم فيه صلاح بتقبيل يدها)..

**مختار:** قال ايه يا سيدى بتقول انك بقيت تتقل علينا

وموش عاوز تنزل تفتطر معانا بدرى زى زمان ..

**صلاح:** معقولة يا ماما .. اللي حصل انى اتأخرت فى النوم

النهارده لانى كنت سهران اذاكر ..

**سلوى:** ايوه ياعم .. عاوز تبقى معيد عليه ..

**صلاح:** ياريت .. علشان ما خللكيش تخرجى من البيت

نهائى واذاكرك لك كل حاجة هنا ..

**الام:** شفت الغيره يا حاج اللي على أصولها ..

**مختار:** قصدك ايه يا ام سلوى .. يعنى انتى شايفه انى ما

باغيرش عليكى ..

**سلوى:** (ضاحكة لصلاح) المعركة هاتبدأ ..

**الام:** لا معركة ولا خناقة ياستى .. احنا بقى فينا اللي

يتغار عليه ..

**مختار:** (فى تودد) طيب ايه رأيك بقى انا باغير عليكى

وخصوصا من الجدع ده (مختار يشير إلى صلاح

ويضحك الجميع فى سعادة) ..

**صلاح:** معقول يا حاج انا ماما بتجنبنى اكتر منك ..

**الام:** قوله يا بنى ..

**مختار:** يعن اطمئن ..

**الام:** وتخط في بطنك بطيخة صيفى ..

**مختار:** ماشى يالالا يا صلاح اعملك همه عشان تنزل  
الشغل معايا **(يتوقف فجأة عن الحديث)** إلا قولى ..  
انت عندك جامعة النهاردة؟ ..

**صلاح:** جامعة ايه يابابا .. حضرتك ناسى ان عندى مشوار  
البنك علشان توريد النص مليون اللى ربنا كرمنا  
بيهم من بيعة امبارح ..

**سلوى:** بعد ما تخلص تجيى الكلية عشان تاخذنى ..

**صلاح:** انتى مش رايحة بعريتك ..

**سلوى:** لأ ..

**صلاح:** امال انا علمتك السواقة ليه ..

**سلوى:** ما انت عارف انى ما باعرفش اسوق فى الزحمة ..

**الام:** لا يا صلاح يابنى .. اعمل معروف خليك معاها

شويه كمان .. احنا مش ناقصين اعمل معروف ..

**صلاح:** ده كلام .. ده انا فداها وفداك وفدا الحاج وفداكم

كلكم .. هو انا لى حد غيركم فى الوجود ..

**(مختار يستعد للخروج وسلوى تجمع بعض الكتب**

**والام ترفع الصحون)**

**صلاح:** الفلوس فى يا حاج؟ ..

**مختار:** اديله يا ام سلوى النص مليون اللى محطوطين فى  
الدولاب .. سلام عليكم

**- اظلام تدريجى -**

## المشهد الثالث

### المحكمة

(الضوء على منصة القضاء الخالية .. وصلاح  
يجلس فى قفص الاتهام ساكنا).

ص/ المدعي: وهكذا استطاع المتهم .. ان يخطط لجريمته  
البشعة .. فلقد احتال اولا على قلوب ومشاعر هذه  
الأسرة المسكينة بحجة انه طفل ضال فقد أهله  
وذويه .. ولا يعرف له اصل او هوية .. والواقع يا  
سادة ان التحريات التى اجريت حول ظروف  
وملابسات ظهور المتهم لهم قد أثبتت إنه لقيط وانه  
كان فى حضانة أحد الملاجئ الخيرية وله ملف بها ..  
وقبل ان نفكر فى نظره اشفاق لماضيه .. فإننا نشير

إلى إنه وبرغم حداثة سنه حين التقى بالجنى عليه  
الحاج مختار استطاع أن يؤثر فيه منذ البداية .. بالله  
عليكم كيف لهذا الطفل ان يصل إلى تلك الحد من  
المراوغة والتضليل .. أليس هذا يؤكد وجود المجرم  
فى داخله منذ البداية .. ومنذ نعومة أظافره ..

**ص / القاضي :** إيه رأيك فى الكلام ده أنت فعلا ..

**(صلاح يشير بيده نحو المنصة كأنه يوقف القاضي  
عن الاسترسال) .**

**صـلاح :** (موافقا) كل اللى اتقال صحيح ..

**ص / المدعي :** (صارخا) أرجو من عدالة المحكمة سؤال المتهم عن  
سر انكاره لماضيه لان ذلك فى صميم الدعوى  
المقامة ضده .

**ص / القاضي :** المتهم ممكن يوضح الأسباب ؟

**(صلاح يتجه بوجهه ناحية الجمهور ثم يجلس فى  
مراة) ..**

**صـلاح :** هناك .. لما كنت فى الملجأ .. كان فيه تجاوز لكل  
تصرف باعمله .. حتى لما كنت باكدب كانوا  
بيوهمونى انهم صدقونى .. كانت نظرتهم ليه  
ولغيرى من الاطفال اللى زىي .. نظره عطف لطفل



مسكين كل ذنبه انه نزل ضيف من بطن واحده ما  
يعرفهاش .. ولمدة تسع شهور كاملين .. يا ترى كان  
ضيف عزيز ولا سخييف .. موش عارف .. لكنى  
الى اعرفه إننا فى النهاية افترقنا على باب جامع ..

### **(فجأة ينهض صلاح ويتجه بالحديث نحو منصة**

**القضاء فى حدة) تصور يا حضرة القاضى .. تصور**

انى كنت بانادى الداده فى الملجأ واقولها يا ماما ..

وانادى المشرفة كمان واقولها يا ماما .. كانوا

بيردوا عليه ويقولولى نعم يا حبيبى .. وساعات يا

ضنايا .. بالرغم من انى كنت باكذب عليهم فى

الكلمة دى .. وبالرغم من انههم قالولى ان الى

بيكذب بيروح النار .. ايامها مكنتش اعرف النار ..

بس مش عارف ليه كنت باخاف منها .. باخاف

منها لغاية ما عرفتها **(يتوقف لحظة) النار هنا يا**

حضرات .. النار فى العالم الكبير ده .. العالم

الصغير هناك مافيهوش نار .. فيه ان الطفل لو بكى

يلاقى الى يمسح دموعه .. لو قال جعان يلاقى الى

يطعمه .. لو قال اشرب يلاقى الى يسقيه .. لو قال

تعبت يلاقى الى يشيله .. لكن هنا لو فتح بقه

يداس بدون رحمه .. والناس تجرى فوقه علشان  
تلحق معادها .. حتى لو كان ميعاد لسرقه أو سهره  
حمرا أو اتفاق على قتل قتيل ..

- إظلام تدريجى -

## المشهد الرابع غرفة الصالون

(سلوى تجلس على الأريكة وهي تقرأ في كتاب  
بصوت عالي مسموع حتى تستوعب ما تقرأ) ..

**سلوى:** المذهب النفسى .. اصطلاح أطلقه (هومرل) فى  
الابحاث المنطقية للدلالة على نزعة تجريبية فلسفية  
شاعت فى اخريات القرن التاسع عشر وان كان لها  
رواد سابقون .. يمثلها فى الحقبة الأخيرة (جون  
ستيوارت ميل) ..

(يدخل صلاح الذى يحمل بين يديه كتبه هو الآخر  
حيث تتوقف سلوى عن القراءة وتنظر له وهو  
يبتسم لها ويهز رأسه لها بالاستمرار) ..

**صلاح:** ما تكملی .. موش دی نظریة الانفعالات  
لسارتر؟ ..

**سلوي:** بالضبط انا صوتی عالی مشوشر عليك ..

**صلاح:** لا أبدا .. ده انتی بتخلینى افكر معلومات كنت  
قربت انساها ..

**سلوي:** یا ولد .. هو انت بتنسى حاجة أبدا ..

(صلاح یلقى كتبه جانبا ویجلس لیواجه سلوى  
التي تنظر إلیه فی تفحص) ..

**سلوي:** مالك؟ ..

**صلاح:** بقول ..

**سلوي:** قول انا معاك (ثم تلقى بالكتاب هی الأخرى فی  
اصفاء كامل لصلاح) .

**صلاح:** (بعد لحظة تفكير) تفتكری احنا وصلنا للحد اللي  
انا وانت فيه اصبحنا شيء واحد ..

**سلوي:** (على الفور) .. ودى محتاجه لسؤال ..

**صلاح:** (یهز راسه بالموافقة ثم بعد لحظة تفكير) فيه  
ساعات الانسان برغم قناعته التامة بأنه صادق فی  
كل شيء إلا أنه ممكن یحس بأنه ماكانش صادق فی  
ولا حاجة ..

**سلوي:** افندم؟ ..

**صلاح:** الكلام ده ممكن ولا مش ممكن ..

**سلوي:** ممكن جدا وده يعتبر انسان سوى زى علماء النفس  
ما بيقولوا ..

**صلاح:** طيب لو اكتشفتى فى يوم انى كذبت عليكى كذبه  
صغيرة .. ممكن تتسامحى فيها وتتجاوزى عنها ..

**سلوي:** مستحيل طبعا .. انا يوم ما اكتشف انك كذبت  
عليه حتى فى فتوته صغيرة هايكون آخر يوم بينى  
وبينك ..

**صلاح:** (جانبا) حتى انت يا سلوى .. امال هقول لمن ..  
وارتاح مع مين؟

**سلوي:** (بعد محاولة تسمع لما يقوله صلاح) بتقول ايه ..  
سمعنى ..

**صلاح:** بقول انى مش ممكن اكذب عليكى ابدًا .. والايام  
حاتشهد بكده ..

(صلاح يجمع كتبه بعد ان ينظر لساعته ويستعد  
للخروج) ..

**سلوي:** على فين؟ ..

**صلاح:** هاحاول انام شويه .. علشان بكره عندى شغل ..

تصبحی علی خیر ..

(سلوی تشير إلیه بالتحیة وهو یختفی بعیدا) ..

-اعلام تدریجی -

## المشهد الخامس المحكمة

(المنصة خالية ايضا وصلاح يجلس فى استرخاء  
خلف القفص الحديدى غير مباليا بما يقال فهو فى  
حالة تفكير عميق) ..

ص / المدعي: لم يمنعه العلم الذى كان ثمرة من ثمار عطف المجنى  
عليه ومساندته الدائمة له .. لقد انفق عليه من ماله  
كأنه أحد ابنائه .. بل لقد وضعه فى مرتبة ابنه الثانى  
لابنته الوحيدة سلوى .. سلوى تلك المسكينة التى  
تعلقت به وكانت تبادل له الثقة رغم كل ما كان يقدمه  
من أكاذيب مسمومة نحو غد يجمع بينهما فى عش  
زوجية لم يقدر له ان يكون .. وأما هذه الزوجة

البائسة فقد قدمت له كل الحنان وكل الحب .. ولم  
يكتفى بأن يسلبها كل ما كان بقلبها الكبير من  
عاطفة إنسانية نحوه بل تطاولت يده لتسلبها رفيق  
عمرها وعماد حياتها الحاج مختار القتيل .

**(مزج صوتي للام فى نهاية حديث المدعى للحديث  
الذى سيتم بيعها وبين صلاح الذى مازال شاردا مع  
افكاره مع تركيز الضوء عليه) ..**

**ص / الأم:** ايه ده كله يا صلاح .. امال انت بتصرف ايه يا  
حبيبى على نفسك ..

**ص / صلاح:** عارفه يا ماما نفسى اللي بحوشه معاك ده يوصل  
لمليون جنيه ..

**ص / الأم:** مليون جنيه مرة واحدة ؟ ..

**ص / صلاح:** وبيقوا شويه كمان على مهر سلوى ..

**ص / الأم:** تعيش يا حبيبى .. انت عندنا تسوى ملايين .. بس  
انت شد حيلك كده وخذ اليسانس بتاعك  
وساعتها كل حاجة هاتتحل ..

**(صلاح يضحك فى الفلاش باك فى سخرية ويضع  
صوته فى فراغ عميق) .**

**- اظلام تدريجى -**



## المشهد السادس غرفة التحقيق

(يجلس وكيل النيابة وامامه يقف صلاح فى هدوء  
كامل ويبدو عليه الاستسلام كما تقف الام بملابس  
الحداد فى مواجهة وكيل النيابة الذى يقلب فى  
بعض الاوراق ثم يوجه حديثه إليهما) .

**وكيل. النيابة:** المتهم يا حاجة فى أقواله بيقول إنه كان محل ثقة  
المرحوم وثقتك انت كمان ..

**الام:** كان ؟ ..

**وكيل. النيابة:** بيقول كمان ان المبلغ اللى اتسرق كان فيه أكثر منه  
بكتير تحت ايده فى يوم من الايام .. الكلام ده  
صحيح ؟ ..

الام: احتمال ..

وكيل .نيابة: حضرتك كنتى بتستلمى منه فلوس المحل بين وقت

والثانى ..

الام: ساعات ..

وكيل .نيابة: كان اكبر مبلغ استلمتیه منه قد ايه ؟ ..

الام: ٧٥٠ ألف ..

وكيل .نيابة: والمبلغ المسروق كام بالضبط ؟

الام: خمسين ألف ..

وكيل .نيابة: ايه رأيك فى الملاحظة دى .. مالفتتش نظرك

لحاجه ؟ ..

الام: انا باتهمه انه هو اللى قتل جوزى .. وهو ده كل

اللى عندى ..

وكيل .نيابة: طيب اتفضلى امضى هنا ..

(وكيل النيابة يقدم الاوراق إلى الام التى تعوقف

وتنظر إلى صلاح الذى ينظر إليها فى مراره) ..

الام: الختم بتاعى معاه .. ولو سمحت اثبت ده فى

المحضر .. لانه جايز يكون عمل بيه حاجة من ورايا

لاجل ما يضيعنى أنا والبنت ..

وكيل .نيابة: (وهو يقدم الختامة للام لاحظ بصمة يدها) ها اثبت

كل حاجة .. ابصمى هنا لو سمحتى ..

الام: (بعد ان تقوم بوضع بصمة أصبعها وللمحقق)

مطلوب منى شىء تانى ..

وكيل .نيابة: لا شكرا .. اتفضلى ..

(تخرج الام وهى تنظر لصلاح شذرا وتختفى

تماما) ..

وكيل .نيابة: (بعد ان ينظر إلى صلاح لحظة) دى أول واحدة

طلبت اقوالها كشاهدة نفى .. نشوف التانيه ؟

(ينادى) الشاهد التانى يا عسكرى ..

(تتقدم سيدة نراها للمرة الاولى فى ملابس وقوره

وهى مديرة الملجأ وتدخل وهى تنظر الى صلاح

نظرة اشفاق ويبادلها صلاح نفس النظرة ثم يندفع

نحوها ليقبل يدها ويلقى برأسه على كتفها وهى

تربت عليه فى حنان وتنظر إلى وكيل النيابة وهى

تهز رأسها بنفى كل ما تراه امامها) .

وكيل .نيابة: اتفضلى استريحى يا مدام إحسان ..

(صلاح يساعد إحسان على الجلوس فى مكانه الذى

اصبح الاقرب لها ثم يجلس القرفصاء بجانبها) ..

وكيل .نيابة: هو ده صلاح اللى كان عندك فى الملجأ ؟ ..

**إحسان:** هو .. بس للأسف كبير .. كبير كثير ..

**وكيل .نيابة:** المتهم بنقول انك كنت دائماً بتشهديله بانه مثال  
للامانة والشرف ..

**إحسان:** صلاح عمره ما غلط غلطه زى دى .. عمره ..

**وكيل .نيابة:** وهو كان فيه قدامه خمسين الف جنيه وما  
عملهاش .. المتهم بيحكى عن واقعة مهمة حصلت  
وشايف انها ممكن تساعد .. هل صحيح ان المحنى  
عليه كان على علم بأن صلاح كان نزيل عندكم فى  
الملجأ؟ ..

**إحسان:** فى يوم .. ومن حوالى خمس سنين .. صلاح جه  
زارنى وكان معاه راجل محترم .. يومها قاللى ان  
الراجل ده هو اللى عايش عنده ويعتبر متبنيه الراجل  
ده يوميه اتبرع للملجأ بمبلغ ميت ألف جنيه ..  
فاكراه كويس .

**وكيل .نيابة:** الراجل ده هو المحنى عليه واللى صلاح متهم بقتله ..

**إحسان:** ده لو كان عملها تبقى اكبر غلطه غلطها فى  
حياته .. غلطه لا يمكن أبدا تغتفر .. يارتها ما تكون  
الحقيقة ياريتها

(صلاح ينهض فجأة ليواجه إحسان فى اعتراض فى

الوقت الذى تنظر فيه إحسان لصلاح بنظرة عتاب)..

**صلاح:** (رافضا) حضرتك تتصورى انى ممكن أقتل .. أنا  
أقتل يا ماما إحسان ؟ أنا ؟ ..

**وكيل. نيابة:** اكيد فيه ايصال متحرر بالمبلغ اللي اخدتيه من الحاج  
مختار...

**إحسان:** طبعاً ..

**وكيل. نيابة:** ممكن تجهيلنا صوره من كعب الايصال ..

**إحسان:** (فى انفعال) النصيبه ان الكعب موجود .. بس للاسف  
مكتوب فى خانه المورد فاعل خير .. موش عارفه ليه  
ظروفك جت كده يا صلاح .. موش عارفه .. (وتبكي) ..

**وكيل. نيابة:** اتفضللى يا مدام ..

**(صلاح يمسك بيدها فى وداع حزين حيث تخرج  
من المسرح تماماً) .**

**وكيل. نيابة:** الشاهد الثالث يدخل ..

**(تدخل سلوى بملابس الحداد ومازال صلاح فى  
الامه من الموقف السابق)**

**وكيل. نيابة:** الآنسه سلوى بنت المرحوم الحاج مختار ..

**سلوى:** ايوه ..

**(وكيل النيابة يشير لها بالجلوس حيث تجلس وهى**

**تنظر إلى صلاح في ضيق في الوقت الذي يجلس**

**فيه صلاح دون أى انفعال ملحوظ بالنسبة لها) ..**

**وكيل .نيابة:** المتهم فى اقواله يقول ان علاقته بيكى تؤكد عدم

وجود أى سوء نية بالنسبة لك على الاقل ..

**سلوى:** مافيش أى علاقة بينى وبينه علشان يقول حاجه زى

كده ..

**وكيل .نيابة:** يعنى ماكنش فيه مشروع جواز؟ ..

**سلوى:** موش لما يكون فيه تكافؤ اجتماعى بين الزوج

والزوجة أولاً ..

**وكيل .نيابة:** كمان يقول ان مواقفه معاك تؤكد نبل العلاقة اللي

كانت بتربطه بالاسرة وانك شاهدة نفى هيستعين

بيه فى الدفاع ..

**(سلوى تمسح بعض الدموع التى فاضت من**

**عينيه) .. لكنها سرعان ما تعتدل فى**

**جلستها وترمق صلاح بنظرة احتقار**

**سلوى:** وشماتة) ..

يا افندم كل اللي بيقوله فى نظرى مجرد قشه

بيحاول يتعلق بيها أى غريق .. مش معقول ان قاتل

يحب ويخلص لبنت ضحيته فى يوم من الايام ..

عملية مستحيلة طبعاً ..

**وكيل . نهاية :** طيب تفتكرى انه حب يطلعك مرة على سر معين  
وهو متردد وقلقان .. هو ذكر انه لمحك بحاجه زى  
كده ..

**سوي :** ما افتكرش .. وماحصلش .. ده كداب ..

**إعلام تدريجى**





## المشهد السابع المحكمة

(منصة القضاء خالية أيضا ويقف صلاح خلف

القفس ووجهه في اتجاه المدعى الذى لانراه الآن)..

ص/ المدعى: وحاول المتهم ان ينهى هذا الدور التمثيلى فى المكان

والزمان اللذين حددتهما لكن الظروف تشاء ان

يكشف سره فى اللحظة المناسبة ليكون صيدا سهل

المنال كما كانت فريسته المرحوم مختار..

صلاح: (صارخا) انا ما قتلتش..

ص/ القاضي: أمال مين اللى قتل..

صلاح: ما شفتش..

ص/ القاضي: المبلغ وديته فين؟..

**صلاح:** صدقوني انا ماقتلتش .. وما سرقتش حاجة ..

**ص / القاضي:** والأدلة .. والشهود .. وتقرير الطب الشرعى ..

**صلاح:** معقول الظروف وسوء الحظ يبقوا هما الأدلة

والشهود .. انا ماقتلتش .. ما قتلتش ..

**ص / القاضي:** من أدعى خلاف الظاهر عليه عبء الاثبات .. وانت

دلوقت متهم .. وفيه جريمه .. وفيه دليل .. وفيه

شاهد موجود .. يبقى ايه اللى ناقص .. الحكم يا

صلاح ..

**اطلاح تدريجى**

## المشهد الثامن

### محل مختار

(خلف طاولة باغل يجلس الحاج مختار وهو يقوم  
بعدد بعض الاوراق النقدية ويضعها فى حقيبته ..  
بينما صلاح يقوم هو الاخر بعدد بعض الاوراق  
النقدية ايضا ويبدو انهم قد انتهوا من هذا الامر  
فيقوم صلاح باغلاق الحقيبة ثم يجلس مرة اخرى  
ليستريح وينظر فى ساعة يده) ..

**مختار:** تأخرنا يا صلاح ..

**صلاح:** لسه بدرى ..

**مختار:** الساعة دخلت على اتنين .. وتلاقى الحاجة وسلوى  
قاعدين ينفخوا ..

**صلاح:** الشغل هنسييه لمن ..

**مختار:** الشغل عمره ما بيخلص .. البنى آدم هو اللي

بيخلص .. (ويبدو انه قد انتهى من عمله) .. ياللا

يا سيدى ادخل اطفى نور الخزن وسك الخزنه ..

**صلاح:** دى فاضيه يا حاج ..

**مختار:** برضه اقلها موش هايخسر ..

(صلاح يتناول المفاتيح من مختار ويختفى خارج

المسرح وفي نفس الوقت يهجم رجلان على

وجهيهما الاقنعة يتقدم احدهما بمدية يعالج بها

مختار فى ظهره اما الآخر فيتناول حقيبة المال من

أمامه ويفرغ ما بها في جوال صغير يحمله في

الوقت الذى تنخفض فيه أنوار اهل من الداخل

ويبدو أن الطعنة اصابت مختار إصابة شديدة

يحاول معها الوقوف فلا يستطيع) ..

**مختار:** (مستجدا وهو يسقط ميتا) لا .. لا .. لا .. يا صلاح .. لا ..

**صلاح:** (والذى يخرج على الفور ليجد مختاراً ملقى على

الارض بين الرجلين فيمسك بالحقيبة من الذى كان

يفرغ ما بداخلها وصارخا) عملتوا ايه يا ولاد

الكلب .. عملتوا ايه ؟ ..

(بالحركة البطيئة تدور معركة بين الرجلين وصلاح  
تنتهي بأمساك صلاح بالحقيبة وهروب الاثنين  
ويتجه صلاح نحو مختار فى النهاية ليكتشف أمر  
المدييه ليمسك بها مذعورا ويتراجع من بشاعة ما  
يرى.. وفجأة ايضا يضاء كشاف نور بطارية قوى  
على وجهه وهو يمسك بالمدييه وكذلك بحقيبة  
النقود وامامه الجثة.. ويكون خلف هذا الموقف  
الجندي المكلف بالحراسة)..

الجندي: انا سمعت استغاثة الراجل منك من على نص  
كيلو.. جيت أجرى..

(الجندي يصبو مسدسه صوب صلاح الذى لا  
يصدق ما يحدث).. إوعي تتحرك.

اظلام تدرىجى



## المشهد التاسع المحكمة

(منصة القضاء خالية ايضا .. وصلاح يجلس خلف  
القفس وهو يخفى وجهه ومازال يعايش نهاية  
المشهد السابق) .

ص / المدعي : وهكذا ايها السادة ينتهى بنا الامر الى كيفية وقوع  
تلك الجريمة الشنعاء هكذا وقد اتضحت كل  
ابعادها ودوافعها !! والان .. هل يترك القانون أمثال  
هذا المتهم الذى جاء من وسط غابات الخطيئة  
ليشكل خطيئة أخرى بين جنابات هذا المجتمع  
الطاهر .. هل سيترك دون عقوبة رادعة لامثاله ..  
إننى حين أطالب هنا بالقصاص منه فإننى اشدد على

ضرورة الحكم بالاعدام له وهذا أقل ما يريح صدر المجتمع وصدر تلك الاسرة المنكوبة .. وشكرا ..

**ص / القاضي :** الدفاع عن المتهم يتفضل .. (من بين الجمهور بالصالة يتقدم الحاج مختار فى ملابس الدفاع .. صلاح ينظر إلى مختار ولا تبدو عليه الدهشة لكونه دفاعه من الداخل بل إنه ينظر له نظرة المتهم إلى من يدافع عنه في الواقع .. ويصعد مختار إلى المسرح ليوجه حديثه إلى الجمهور) ..

**مختار :** حضرات السادة والسيدات .. اننى هنا لست بوصفى محام عن المتهم .. بل جئت شاهدا على ما حدث لأننى كنت هناك كما رأيتم .. لذا ساورد لحضراتكم بعض الحقائق التى رأيتموها .. عسى ان يكون فيها دفعوه وبرأته .. اولاً .. سمع الشرطى الملكف بالحراسه لفظاً منى لحظة الموت وهو كلمة (لا .. لا .. لا يا صلاح) قلتها عالياً .. قلتها مستنجداً به لست مستنجداً منه كما قال رجل الامن .. ثانياً .. ما الذى كان يدعو المتهم للوقوف بجانب جثتى فى الفترة ما بين وقوع الجريمة وحضور الشرطى .. وهنا اسمحوالى ان اعود إلى ما سبق ان



ذكره الشرطى من انه كان على بعد نصف كيلو من مكان الجريمة .. لو ان المتهم قد ابتعد عن مكانها وبنفس السرعة التى وصل بها الشرطى .. فهل كانا سيلتقيان امام جثتى كما رأيتم ؟ .. ثالثا .. جاء فى اقوال السيدة مديرة الملجأ الخيرية ان المتهم قد اصطحب معه رجل فى حكم المتبنى له ولقد دفع هذا الرجل مبلغ مائة الف جنيه تبرعا منه للدار .. ودعونا نتساءل بعيدا وبغض النظر عن اقوال مديرة الملجأ .. نتساءل .. هل كان المتهم وهو يعد لجريمة ستقع مستقبلا .. هل كان يسمح لهذا المحسن أو فاعل الخير ان يتبرع بمائة الف جنيه امعانا منه فى التخطيط لجريمته .. ثم نتساءل أخيرا .. وما الفائدة من هذا كله حين وقع فى قبضه العدالة الآن .. رابعا واخيرا .. جاء فى التحقيق ان المتهم كان سيتزوج من ابنتى وهذا ما ورد فى اقوال متضاربة بينها وبين زوجته .. ونحن هنا نلتمس لهما العذر فلقد هالهما ما حدث لى من جراء تلك الجريمة البشعة .. لقد كان المتهم بالفعل سيتزوج من سلوى وهى الابنة الوحيدة لى والوريثة الشرعية ايضا . أى ان

هناك اضعاف هذا المبلغ كان سيأتى اليه دون ان  
تراق قطرة دم واحدة .. وكان سيصبح لو كنت على  
قيد الحياة شريكا كاملا لى حسب ما جاء فى اقوال  
زوجتى من انه كان محل ثقتى وثقتها والتي كانت  
بلا حدود .. سادتى .. الكل هنا قد نعت المتهم  
وقال انه ابن خطيئة .. وكأنها جريمة أخرى يراد بها  
ان تضاف لجريمته .. واسمحوا لى أن أقول هنا أن  
الانسان إذا عوقب فلا بد ان يكون العقاب من جنس  
العمل .. والعمل هنا لا بد ان يكون بفعلته هو ..  
فهل هو الذى قام بالخطيئة ؟ إن الله لا يحاسب عبدا  
على ما اقترفه الغير .. فالله وكما يعرف الجميع هو  
العادل الاكبر فى ميزانه .. دعونا نتخلى عن علاقة  
السببيه بين ظروف الفرد وبين افعاله حتى لانزهق  
روح بلا حق وتضيع منا قيمة العدل الذى هو أساس  
الملك ..

- إظلام تدريجى -

## المشهد العاشر الزنزانة

(رجل الدين الذى يخلق المصحف بعد ان يختم  
قراءته وهو يقف امام صلاح الذى نراه جالسا ارضا  
فى حالة من الذهول التام) ..

**المصلح:** صدق الله العظيم .. قول يا صلاح .. استغفر الله ..

**صلاح:** استغفر الله ..

**المصلح:** وندمت على ما فعلت ..

**صلاح:** (الذى يقف فجأة معارضا ويتجه نحو الشاباك

الصغير وهو يتجه نحو السماء ويهز رأسه بالنفى)

لا موش هاندم .. لأ ..

**المصلح:** الندم يا بنى ضرورة لكل إنسان مؤمن ..

**مـصـلـح:** (فى حدة) انا ما قتلتش يا مولانا .. ماقتلتش ..

**المصلح:** دى حاجه بينك وبين ربك .. جايز تكون زى ما بتقول .. شىء يعلمه هو ..

**مـصـلـح:** واتعدم واتشنق علشان جايز اكون وجايز ما اكونش ..

**المصلح:** يا بنى القاضى حكم باللى شايفه .. والحكم اللى احنا فيه دلوقتى هو نصيبك فى الدنيا ..

**مـصـلـح:** (وهو يستدير فى جنون) نصيبى .. أموت .. أتعدم ظلم واتحرم من حياتى .. وتقولى ده نصيبك فى الدنيا ..

**المصلح:** وليه ما تقولش أن دى تعتبر ساعتك ..

**مـصـلـح:** (وهو يتحدث للمصلح فى شبه توسل) يا مولانا .. ارجوك ..

**المصلح:** اتفضل ...

**مـصـلـح:** إذا اقسمتلك بالله انى ما قتلتش .. ممكن تصدقنى ..

**المصلح:** أظن .. جاوبتك قبل كده وقتلتك الله أعلم ..

**مـصـلـح:** يعنى موش مصدقنى ..

**المصلح:** هو وحده المطلع على ما تخفى الصدور والسرائر ..

**صلاح:** (پیدو انه فی انهیار تدریجی) والناس هاتوصل لده

ازای علشان تتأكد من براءتی ..

**المصلح:** یکفاک انه یعلمها علام الغیوب ..

**صلاح:** الی عاوز اعرفه انا لیه مصدق کلامک من غیر

دلیل وانت لیه مش عاوز تصدق حلفانی رغم ان

معایا الدلیل ..

**المصلح:** ایه هو ؟ ..

**صلاح:** ایمانی برینا .. وبانه مایرضاش بالظلم (صلاح پیدو

علیه الانبهار اکثر واكثر) انتوا لیه عاوزنی

اموت .. لیه عاوزنی ارضی بظلمکم وشویه شویه

اقولکم متشکرین .. فیه حد فی الدنیا یوافق علی

انه یتشنق وهو بریء .. انتم عاوزین تجننونی ..

عاوزین تجننونی .. حرام علیکم .. حرام علیکم

(یصرخ فی هستیریا) ..

**إفلام تدریجی**



## المشهد الحادى عشر والأخير المحكمة

(على منصة القضاء يقف صلاح وهو يقرأ من ورقة طويلة للغاية تمتد إلى بداية خشبة المسرح).

**صلاح:** بالنظر فى قضية مقتل الحاج مختار والمتهم فيها المدعو صلاح الدين فتوح .. وبعد الاطلاع على أقوال الشهود واستعراض كافة الادلة والبراهين التى قدمها دفاع المتهم وجد انه برىء من كل ما نسب إليه .. وعليه فقد حكمت المحكمة حضوريا ببراءته واخلاء سبيله وحفظ اوراق القضية لمجهولية مرتكبها الى حين القبض عليهم او استيقاظ ضمايرهم وتقديم أنفسهم للعدالة .. رفعت الجلسة ..

(صلاح وهو يصفق ويصفر كما كان الجمهور في  
بداية المسرحية وينفس الاسلوب المتقطع اسلوب  
مباريات الكورة: هو .. هو .. براءة .. هو .. هو ..  
براءة ..)

(فجأة يظهر جميع الممثلين الذين اشتركوا في  
العرض يحيطون بصلاح ويدفعونه في صرامة نحو  
قفص الاتهام .. وصلاح بالداخل يبدو بالفعل انه قد  
اصيب بالجنون وهو يسمعهم وهم ينشدون سوبا  
في لحن جنائزى متصاعد شيئا فشيئا ليصل إلى  
نشيد للغار يدوى في جنبات المسرح).

**الجميع:** هو ده المتهم .. هو ده اللي قتل .. لازم يتعدم .. لازم يتعدم ..  
لازم تاخدوا تارنا منه ويدفن .. ازاي ده اصلا جه هنا ..  
وازاي ده أصبح مننا .. لازم يتعدم .. لازم يتعدم (تكرار) ..  
(ينصرف الجميع ويبقى مختار ويتقدم نحو  
الجمهور ليحدثه في سخرية من صلاح).

**مختار:** تصوروا حضراتكم ان المتهم صلاح الدين فتوح أخذ  
براءة من الاعداء. انا شخصا موش عارف دى  
حصلت ازاي .. صلاح يطلع برىء وموش هيتشقق ..  
ده كلام (ثم وهو ينظر نحو صلاح) عارفين ايه سبب



البراءة قال ايه .. الجدع ده ولا مؤاخذه وبعيد عنكم  
جميعا .. إيجن .. والقانون بيقول ان اللى يتجنن ما  
يتعدمش .. اللى يتعدم لازم يكون صاغ سليم ويحس  
بحبل المشنقة ويشوف تبرئة عشناوى وتبقى اخر  
حاجة يشوفها ( فجأة يبكى مختار وهو يتقدم نحو  
القفس حيث يحتضن الاسياخ الحديدية فى الوقت  
الذى يقوم فيه صلاح بأداء حركات غير مفهومة  
بداخل القفس) معلش يا صلاح .. معلش .. انت  
اتظلمت كتير .. وجايز جنانك ده هو شاهد النفى  
الوحيد على انك مظلوم .. الظلم مستقصدك من  
البداية .. من ناس لاتعرفهم ولايعرفوك .. ناس  
جابوك للظلم وسابوك .. وبعدين اتظلمت من ناس  
تانيه تعرفهم .. وللاسف عمرهم ما عرفوك .. وبين  
اللى تعرفه واللى ما تعرفوش فيه حقيقة واحدة لابد  
تعرفها حقيقة اسمها الموت الكل هايموت لكن  
الظلم ها يفضل باقى .. لحد آخر بنى آدم ماييموت ..  
لأن هو اللى اخترعه من البداية يوم ما ظلم نفسه  
وخرج من الجنة ورضى بالعذاب اللى إحنا فيه .

**تدريجى مع نزول الستائر**



## المدولة الثانية



## المنظر

(خلفية المسرح ستارة بيضاء عليها الكثير من بقع الدماء وكذلك آثار بصمات لبعض الايادى بلون الدم ايضا وفى الوسط صوره زفاف لفتاة فى بداية من المراهقة وخشبة المسرح بها ثلاث ديكورات : الاول من يمين المسرح (منزل الأم) وهو عبارة عن هيكل لمنزل ريفى من الداخل وامام الباب توجد (المسطبة) الشهيرة لفل تلك المنازل ويتوسط المنزل سرير عتيق . والثانى من يسار المسرح (منزل الاب) وهو عبارة عن هيكل ايضا لغرفة تتوسطها طاولة عليها زجاجات الخمر وما شابه .

اما الثالث وفي الوسط نرى شيزلويج كبير وامامه  
مقعدان شرقيان من الجلد ونشعر من خلال الديكور  
هنا بالتعرف يحيط بالمكان الى حد ما .

نلاحظ ان هناك طريق يربط الديكور الاول  
بالديكور الثاني وكذلك طريقان يربطان بين الثالث  
والأول والثالث والثاني اى إن الديكور الثالث هو  
رأس المثلث لتلك الديكورات ..

مع اظلام الصالة تتركز الاضاءة على اللوحة الزيتية  
للفتاة فى ملابس الزفاف ونسمع زغاريد (وكانها  
صراخ) ودقات الطبول فى همجيه وكذلك صراخ  
الفتاة فى عنف ..

من نساء يفتنين: بيضتى الشاش .. يا عروسة ..

حلقك رشاش .. يا عروسة ..

.....

قولوا لأبوها ان كان جعان يتعشى ..

وان كان شبعان يفرح ويروح يتمشى ..

عرضه إستتر والى يحبه اتهنى ..

واللى يعاديه تندب فى عينه مقشه ..

## المشهد الأول بيت المخدوم

(تسحب هذه الاصوات بعيدا .. ثم تضاء منطقة  
الوسط لنرى تلك الفتاة - صاحبة الصورة - فى  
ملابس ريفية تمسك بيدها (مقشنة) وتقوم  
بتنظيف المكان فى شيء من الاقبال والسعادة ..

الفتاة: تغنى: قولوا لابيها ان كان جعان يتعشى) ..

(يدخل المسرح شاب وسيم جلسه دون ان تراه  
الفتاة اذ يفاجأها بلكزه فى خصرها فتصرخ خائفة  
وحين تتعرف عليه وتقوم بحركة (البصق فى  
صدرها) وقبل ان تتحدث وتبر عن عتابها له) ..

الشاب: اتخضيتى ؟ ..

**الفتاة:** ودى طريقة برضه يا بيه تدخل على بيها؟..

**الشاب:** امال عايزانى لما ادخل اعمل ايه .. اقول إحم انا

وصلت .. ولا اقول دستور يا ناس ياللى هنا ..

**الفتاة:** (تنظر له فى تحدى ثم تعاود عملها فى عنف ويبدو عليها

الضيق الشديد منه لتثار الاتربة فى وجهه من المقشة) ..

**الشاب:** ايه يابت .. موش تحاسبى ؟..

**الفتاة:** ياريت انت اللى تحاسب ..

**الشاب:** احاسب على ايه ؟..

**الفتاة:** على نفسك .. لا تتبهدل ..

**الشاب:** (وهو يجلس على الشيزلورج فى استرخاء وينظر

لها فى تفحص) عيبك ان كلامك زى الدبش ..

حاولى تحسنى ملافظك شويه وتتردحى ..

**(الفتاة لا تجيب وتلقى بالمقشة وتهم بالتنظيف**

**بالفوطه الصفراء وهى تنظر إلى بعيد)**

**الشاب:** كلامى مش مفهوم ولا ايه .. يابت احنا عاوزين نفهم

بعض ونقرب من بعض .. معقوله ابقى انا وانت فى بيت

واحد وبقى لنا أكثر من اسبوع ولسه ما حصلش ..

**(الفتاة لا تفهم ما يرمى اليه وهى تجمع ادوات**

**النظافه استعدادا للمضى) ..**



**الشاب:** انا باكلم هير و غليفى .. ردى على كلامى ..

**الفتاة:** موش فاهمه حاجه منك ..

**الشاب:** انتى فاهمه ..

**الفتاة:** وشرفك ما فاهمه ..

**الشاب:** طيب إذا شرحتك هاتفهمى ..

**الفتاة:** هافهم .. بس قول ..

**الشاب:** وإذا فهمتى توعدىنى انك موش هاتعمللى هيصه ..

**الفتاة:** هيصه على ايه .. انت هاتقول حاجه غلط لا سمح

الله ؟ ..

**الشاب:** احتمال تفهميها كده ..

**الفتاة:** ولا يكون عندك هميه .. قول وانى هافهم اللي انت

عايزه ..

**الشاب:** هاقول .. بس لو قلتى لماما ولا بابا يومك هايبقى

زفت ..

**الفتاة:** لاحول ولا قوه إلا بالله .. دى سهر ايه ايه دى الله

مش عاوزه تنتهى .. بالاذن ..

الفتاة تهم بالمضى حامله ادوات النظافة وتجه

للخارج .. الشاب يمضى فى اعقابها ويجذبها بقوه

رغم خوفه من رد فعلها .. فى الوقت الذى تتوقف

**فيه الفتاة وهي تنظر إليه في شيء من التحدى**

**والشك ..)**

**الفتاة:** انت عاوز ايه منى ؟ ..

**الشاب:** عايزك ..

**الفتاة:** عاوزنى فى ايه بالضبط ؟ ..

**الشاب:** بصراحه انا حبيتك قوى ..

**الفتاة:** (فى ذهول) هه ..

**الشاب:** حبيتك ..

**الفتاة:** (فى قلق بالغ) نهارك منيل بستين نيلاه .. معاناتها

ايه حبيتك دى ؟ معاناتها ايه ؟ ..

**الشاب:** (مرتبكاً) انا عارف انه نهار منيل فعلاً لانى

اعتبرتك بنى آدمه بتفهمنى ..

**الفتاة:** مين قال انى بنى آدمه .. انا شغاله يابك .. والشغاله

لما تتحب من سيدها تبقى وقعتها هباب .. الكل

بيقول كده .. وعلشان الدور بقى يتلم .. آنى

هاحلها ..

**الشاب:** (خائفاً) هاتعملى ايه ؟ ..

**الفتاة:** ماتخافش .. انى لاهاقول لامك ولا لايوك .. انى

هاقول للى جابونى هنا ينجدونى . فتك بعافيه ..

(الفتاة تمضى بسرعه وتلقى بادوات النظافة  
جانبا .. والشاب يلاحقها بنظراته فى خوف مع  
اظلام هذا الجانب من المسرح وحيث يضاء الديكور  
الثانى ..)

إظلام تدريجى



## المشهد الثانى منزل الأب

(منزل الاب الذى نرى زوجته اللعوب تجلس إلى  
الطاولة تلاعب نفسها بالورق وهى فى حالة من  
الانسجام حيث تدخل الفتاة من الباب المفتوح  
لتحدثها فى تردد واستعطاف .. وتلاحظ ورقة ملقاة  
على الارض تحملها وتقدمها لها فى حذر شديد) ..

الفتاة: مساء الخير يا مرات ابويا ..

زوجة الاب: (فى دون اهتمام) نعم ..

الفتاة: أبا ..

زوجة الاب: ماله ..

الفتاة: آبا هنا ؟ ..

زوجة الاب: عشان ..

الفتاه: عاوزاه ..

زوجة الاب: وانا ما انفعش ..

الفتاه: (تحاول التحلق بابتسامه باهته) ازاي .. ده انتي

الخير والبركه .. بس اني يعني زى ما تقولى كده ..

محتاجاه فى موضوع خصوصى .

زوجة الاب: خصوصى ..

الفتاه: ايوه .. مايتقالش ..

زوجة الاب: ولما هو مايتقالش .. هتقوليلهوله ازاي ؟ ..

الفتاه: مهما كان الامر .. الاب لازما يتحمل .. امال هو

اتخلق لاجل ايه ؟

زوجة الاب: (وهي تعود للعب بالورق دون اهتمام ايضا) ابوك

موش شايفاه بقاله كام يوم ..

الفتاه: (فى ألم) مسافر ؟ ..

زوجة الاب: علمى علمك ..

الفتاه: كان نفسى يكون هنا لاجل ما ينجدنى ..

زوجة الاب: ينجدك من ايه ؟ ..

الفتاه: (فى استسلام) من الشغلانة اللى انى فيها ..

زوجة الاب: مالها الشغلانه ؟ ..

**الفتاه:** سيدى الصغير ..

**زوجة الاب:** ماله .. ضريك ؟ ..

**الفتاه:** ياريت ..

**زوجة الاب:** شتمك ؟ ..

**الفتاه:** ياريت ..

**زوجة الاب:** طردك ؟ ..

**الفتاه:** كان بقى ارحم .. اقله كلاب الشارع الناس شايفها

وعامله حسابها .. لكن كلاب البيوت النفر منا ما

يعرفش سعرتها امتى هاتيحي ..

**زوجة الاب:** (تضحك ضحكه عاليه) ايه الكلام المستغنى ده

يابت .. كلاب شارع ايه و كلاب بيوت ايه ..

ماتفهمينى ..

**الفتاه:** كلاب الشارع لا يمكن تعض الا لو حد أذاها .. لكن

كلاب البيوت بتعض من غير أذيه (فجأه) آنى

عايزه أبا ..

**زوجة الاب:** وانا اجيبهولك منين .. دورى عليه .. ولو لقتيه ابقى

قوليله انى انا كمان عايزاه .. مستنياه على الغدا ..

على العشا .. المهم انه ييجى والسلام .. مع السلامه

ياغندوره ..

(الفتاة تنظر للمرأة وهي تهز رأسها بالاسف لكل  
ما سمعته فى حسره واضحه ثم تمسح دموعها فى  
مراره وتمضى للخارج حيث يظلم منزل الاب..

- اظلام -



## المشهد الثالث

### منزل المخدوم

(يسلط الضوء على الفتاة ويصاحبها إلى مقدمه المسرح حيث منزل الشاب الذى يضاء شيئا فشيئا وينتهى الامر بأن تجلس الفتاة حزينة بالارض وتلقى برأسها على إحدى المقاعد فى ألم وحزن) ..

ص / الفتاة: دى تالت مره أروح لابويا .. وعاشر مره مالقاهوش .. انا عايزاه يعرف لكن .. مين اللى هيعرفه .. مرته ؟ .. مرته لا يمكن هتقوله .. وتقوله ليه وهى مش عاوزه مزاجه يتعكنن .. ولا جايز بتخاف عليه لا يجراه حاجه .. طيب وايه يعنى لما يجراه .. موش احسن ما يجرا لى آنسى ؟ .. (حفظه

**صمت** لا .. حرام .. وألف بعد الشر عليه .. ده  
آنى عندى أموت لاجل ماهو يعيش .. بس نفسى  
اشوفه .. نفسى .. نفسى ..

**الشاب :** **(ينادى من الخارج فجاء)** انت يابت .. انت فين ؟

**(يدخل المسرح ليراها جالسه دون أن تكتعثر)**

**لقدومه** ايه .. نايمه .. إذا كنتى نايمه يبقى كويس ..

وإذا كنتى عامله فيها نايمه يبقى كويس الكويس ..

يا سلام على الكويسات لما تبقى ساكنه **(ويقترع)**

**منها اكثر لكنها فجاء تقف لتواجهه فى تحدى** فيه

ايه ؟ .. **(ثم يغير من لهجته)** انت كنتى فين ؟ ..

قوليلي كنتى فين ؟ ..

**الفتاة :** كنت بره ..

**الشاب :** بره مع مين ؟ ..

**الفتاة :** عند المكوجى ..

**الشاب :** **(مستنكرا)** انا عاوز افهم ايه حكاية المكوجيه

دول .. هما دائما مستقصدنا .. ولا تكونيش انت

كمان بتحبى الصنف ده وعاوزه تتجوزيه ..

**الفتاة :** هو فيه حد كان هنا واتجوز منهم ..

**الشاب :** كل واحدده بتيجى بتبقى معجبه بيهم .. مسافه

ما تربط معاهم تتأهل عدل وانا اتفرقع ..

**الفتاة:** ما تخافش .. لسه بدرى على السهرايه دى ..

**الشاب:** (وحن تنهض الفتاة وتمض خلف الاريكه وتناول

سله مهملات وتعجه نحو الباب فيستوقفها ممسكا

بذراعها) سايبانى ورايحه فين ..

**الفتاة:** ارمى الزباله ..

**الشاب:** سيبك منها دلوقت ..

**الفتاة:** اسيبها لحد ريحتها ماتفوح ..

**الشاب:** يا ستى فيه حاجه اسمها بارفان ..

**الفتاة:** يعنى ايه ؟ ..

**الشاب:** بلاش من البرفان .. انا لى واحد صاحبي دكتور

متخرج جديد

**الفتاة:** وده ماله ومال الزباله ؟ ..

**الشاب:** شغلته .. أى زباله قدامه يقدر ينصف العالم منها فى

ساعه زمن ايده تتلف فى جرير ..

**الفتاة:** (تضحك فى مذاجه) عجيبه يا ولاد .. دكتور

زبال ..

**الشاب:** بلاش عبط بقى .. انت عارفه بياخد كام فى

الكنسه ..

**الفتاة:** كام؟ ..

**الشاب:** خمسميت جنيه .. وعشان ما احنا اصحاب بياخذ  
منى خمسين بس ..

**(الفتاة تضع سله المهملات جانبها وتجلس القرفصاء  
لتستمع فى تعجب ويفحص له وهو مستمرا فى  
حديثه واستدار مواجهها لها وهى لا تعلم شيئا مما  
يقول) ..**

**الشاب:** طيب ايه رأيك بقى انى ساعات باديله اقل من كده  
كمان ساعات باديله عشره .. ساعات باديله  
خمسه .. وساعات إزازه ويسكى أو علبة سجائر ..

**الفتاة:** **(وقد تفهمت الموقف اخيرا)** يا بلاش .. طيب ما  
تجيبه ينكسلك البيت .. وجايز يرضى بانكم  
تخمسوا سوا ..

**الشاب:** أول ما احتاجله هاجيبه ..

**الفتاة:** يكنس ويخمس ..

**الشاب:** عليكى نور .. ياللا بقى ..

**الفتاة:** **(فى حده)** ما تكبر مخك بقى يابك وتسيبك م  
الكلام ده ..

**الشاب:** **(بعد ان يجلس بجانبها ارضا)** تقولى ايه لو اخلى

الموضوع يخلص في صورته محترمه

**الفتاة:** كنس ومسح يعنى ..

**الشاب:** انا باتكلم جد .. ايه رايك نتجوز

**الفتاة:** نتجوز .. معقوله واحده زى يابك .. نتجوز واحد  
زيك ..

**الشاب:** وايه المشكله .. ماكل الناس بتتجوز هي شغلانه ..

**الفتاة:** انت اتجوزت قبل كده ؟ ..

**الشاب:** كان على الطاير .. ماكنتش بلحق من بابا ولا  
ماما ..

**الفتاة:** والله مانى فاهمه حاجه منك .. سيبنى اقوم اشوف  
حالى ..

**(الفتاة تهم بالوقوف فيسمك الشاب بيدها)**

**ليجلسها على الاريكه حيث يجلس بجانبها فى**

**شىء من اللين) ..**

**الشاب:** استنى لما اقولك على حكاية الجواز دى تيجى  
ازاى .. شوفى ياستى ..

**الفتاة:** ياسيدى لا تيجى ولا تروحي انى ماليش صالح  
بيها ..

**الشاب:** شوفى انتى تقولى وهبتك نفسى .. وانا اقولك

قبلت ..

**الفتاة:** قبلت ايه ؟ ..

**الشاب:** قبلت اتجوزك ..

**الفتاة:** من غير مأذون ؟ ..

**الشاب:** .. هو المأذون يفهم فى المسائل دى قدى ده انا استاذ

**الفتاة:** والحاجات دى عرفتها بقى فى المدرسة ولا فى

القهوه اللي بتروحها ..

**الشاب:** اولاً انا موش فى مدرسه انا فى كليه .. ثانياً انا

باروح كافيه نت مش قهوه ..

**الفتاة:** يا حلاوه يا ولاد .. العلام حلو صحيح .. (وفجأة)

اسمع يا أستاذ انت آنى هادعيلك ان ربنا يهديك

لاجل ما تعتقنى من حكاويك دى ..

**(الفتاة تقف فى محاوله للابتعاد عنه لكنه يقف فى**

**مواجهتها) ..**

**الشاب:** طيب ايه رأيك نخليها رسمى .. نكتب على بعض

يعنى .. انتى تكتبى ورقه تقولى فيها انك مراتى ..

وانا اكتب ورقه اقول فيها انى جوزك ..

**الفتاة:** وهو انى لو كنت باعرف اكتب ولا أقرا كان ده بقى

حالى ..

**الشاب:** اكتبها لك انا يا ستى .. ونحط ورقتى على ورقتك  
ونشبكهم فى بعض ونقوم رامينهم فى البحر بعد  
مانلفهم فى منديل ابيض فى ابيض ..

**الفتاة:** (فى تهكم) وكمان منديل أبيض فى ابيض ..

**الشاب:** موش عرسان .. ياريت تصدقنى إنى باحبك ..  
ياريت ..

**الفتاة:** المسامح كريم يابك ..

**الشاب:** المسامح كريم ؟ ..

**الفتاة:** اعقل بقى .. اعقل وسيبك من السهرايه دى .. يمين  
بالله ده شيطان . شيطان راكبك والله .. شيطان ..

(الفتاة تمضى مسرعه وهى تلتقط سله المهملات

وتمشى بها إلى الخارج فى اتجاه الديكور رقم

..(١)

**الشاب:** (يركض خلفها) استنى عندك .. استنى .. انا

مأذون وعاوز اتجوزك .. استنى ..

**إعلام**





## المشهد الرابع أمام منزل الأم

(نرى الام وهي تجلس على المصطبه وتقوم بغزل  
شال كبير.. وتدخل الفتاة وترتمى فى  
احضانها)..

**الفتاة:** وحشانى يا مه.. وحشانى..

**الام:** عامله ايه؟..

**الفتاة:** عامله ايه.. ده انا ياما قعدت ابكى وافتكرت

واقول فين هى لاجل ما اشتكىلك وجيعتى..

**(فجأة)** وياما كنت احلم انى بازعقلك وباخانقك

واقول للناس محدش يحوشنى.. **(الفتاة تنهض**

**معرضه)** ازای یا أمه تنسینی.. ازای تنسی ان

ليكي بنت محتاجه لك محتاجه لأم تسأل عنها ..  
انى فى أول الأمر كنت عذراكى علشان الرجال  
الغريب اللي اتجوزتيه .. لكن دلوقت ..

**الام:** (مقاطعه) المهم اخبارك ايه ؟ ..

**الفتاة:** لغايه دلوقت بخير (تغير لهجتها لشعورها  
بالبروده) ما تقومى بينا ندخل فى الدفا ..

**الام:** عمك نايم ..

**الفتاة:** نقعد فى المطرح التانى ..

**الام:** صوتنا يصحيه .. قوليلي انت سبتى الشغل ..

(الفتاة تعود وتجلس بجانب الام وتناول طرف  
الشال الذى بيدها لتلتحف به من البروده) ..

**الام:** (التى لاحظت صمت الفتاة) مابتريديش يعنى ..

**الفتاة:** آنى ما سبتش الشغل .. آنى هربت منه .. نفدت  
بجلدى .. اللي شفته هناك خلانى اشمع الفتله  
واخلع فى اول قطر يقابلنى ..

**الام:** (فى إزدراء) تخلعى وتشمعى .. مين يابت اللي

علمك الكلام اللي مالوش طعم ده ؟ ..

**الفتاة:** الشغل

**الام:** انا وابوك سلمناك لبيت طيب .. موش خاراه عوالم ..

**الفتاة:** العوالم اشرف ..

**الام:** اخرسى يا قليله الحيا ..

**الفتاة:** خرسى كتيير .. ومن حقى بقى اتكلم .. نفسى

افضفض يا ناس نفسى اقول فيه ايه ..

**الام:** (مقاطعة) رحتى لايوك ؟ ..

**الفتاة:** كل ما اروح مالا قاهوش ..

**الام:** عنه ما اتلاقى .. انت عاوزه ايه دلوقت ؟ ..

**الفتاة:** عايزاك تقوليها لى يا امه من غير خشا .. انت لسه

امى ولا انى جايه لواحد غريبه .

**(الام تسحب الشال من الفتاة فى عنف وتقف فى**

**ضيق شديد وهى تنظر للداخل لتطمئن من عدم**

**وجود أحد يسمع عليها من الداخل) .**

**الام:** طول عمرى زى ابوك لسانك متبرى منك .. فيه بت

متربيه تقول الكلام ده ؟ ..

**الفتاة:** (فى بكاء) باقولك يا مه انى هربت .. طفشت ..

محتاجه لصدر حنين يضمنى بدل الفضيحة اللى

هاتفضحها ..

**الام:** (فى انزعاج) يانصيبك السوده .. اوعى يابت

تكونى سرقتى حاجه منهم ..

**الفتاة:** انى عمرى ماكنت حراميه .. وديلي أظهر من انى  
اعملها ..

**الام:** امال طفشتى ليه ؟ ..

**الفتاة:** .. ديلي كان هايتنجس ..

**الام:** يتنجس ..

**الفتاة:** سيدى الصغير ..

**الام:** ماله ؟ ..

**الفتاة:** (وهى تعلم) كان ..

**الام:** كان ايه يابنت .. انطقى ..

**الفتاة:** كان .. كان بده يتجوزنى ..

**(الام وهى تلقى بالشال وتضحك فى سخرية وتلف**

**حول نفسها لعدم تصديقها ما تقوله الفتاة التى**

**تنظر لها فى دهشه وذهول) ..**

**الفتاة:** موش مصدقانى يا امه ؟ ..

**الام:** (بعد ان تعمالك نفسها) ليه حق يطر دوكى ..

**الفتاة:** يطر دونى ..

**الام:** ايوه .. علشان كلام المجانين اللى بتقوليه ده .. بصى

لنفسك إنت فين هو فين .. عموما روحى ارجعى

شغللك .. وانا ها بقى اجى اشوف الحكاياه دى ..

**الفتاة:** لاجل خاطري يا مه بلاش ..

**الام:** هتروحي ولا اصحي عمك يا خدك بيده يوديك

علشان مالكيش أب قادر يكسرك ..

**الفتاة:** (في خوف) لا يا امه .. بلاش .. خللي الطابق

مستور .. انا هاروح بنفسى .. فتك بعافيه ..

**-اعلام الديكور-**



## مشهد الخامس منزل المخدم

(مع إضاءة الديكور تدخل الفتاة في حزن وبأس  
وتصطدم بالشاب الذي يركع امامها في توسل  
تمثيلي) ..

**الشاب:** ارحميني بقى .. كفايه .. احنا الاتنين مالناش غير  
بعض .. انا بحبك .. بحبك .. ياريت تفهمى يعنى  
ايه بحبك ..

**الفتاة:** النصيبه فاهمه .. فاهمه انها كلمه بدايتها هنا (تشير  
إلى الشيزلوج) واخرتها هناك .. على الرصيف ..

**الشاب:** فى راجل ينيم مواته على الوصيف .. ليه هو مفيش  
سرير ..

**الفتاة:** (فى حده) انت مش جوزى .. ولا انا مرتك .. ولا  
خر مره بقولك بعد عنى ..

**(الشاب يقف فى ضيق ويشيح بوجهه عن الفتاة  
فى أداء تمثيلى ايضا)**

**الشاب:** مافيش فايده .. كنت فاكرك بتحبينى قد  
مباحبك .. كنت فاكرا ن موافقتك على جوازنا فى  
السر تشجيع لى علشان اخلص جامعتى واعلن  
جوازنا قدام الناس .. وعلى فكره .. صاحبي الكناس  
اللى قلتلك عليه ده انا مجربه .. صدقيني  
ماتخافيش ..

**الفتاة:** (مقاطعه) بطل كلام فارغ بقى واحترم نفسك ..  
انت ايه .. مابتحسش

**الشاب:** شويه .. بس انت الظاهر مابتحسش خالص ..

**الفتاة:** (وهى تبعد عنه فى خوف) عارف لو قربت منى  
هاصوت وألم الدنيا عليك .. واقول للخلق كلتها  
على حكايتك وحكايه صاحبك الكناس ..

**اظلام**



## المشهد السادس منزل الأب

(بضياء الديكور هنا حيث يقف الاب امام زوجته  
الجديده ويبدو منكسرا امامها وهي تنطلع إليه في  
سخريه)..

**زوجه الأب:** انا يا خويا موش قاعده هنا لاجل ما استلقى  
المراسيل منك ومنها.. شوفلك صرفه.. انا  
طهقت..

**الاب:** هو آنى اللي باقولها تيجى..

**زوجه الأب:** ماقلتش.. بس فى يدك تقولها ماتجيش..

**الاب:** حاضر.. هاقولها..

**زوجه الأب:** خللى بالك البنيت دى لوجتنى هنا تانى لا انت ولا

هى هاتعتبروها ..

**الاب:**

واروح فين؟ ..

**زوجه الأب:** روح مطرح مابتروح .. خليك فى الخماره نام فيها

تبقى عملت مصلحه هو انا متجوزه ولا حاسه ان

فيه راجل معايا فى البيت ..

**الاب:** ليك على لما اروح لها اول الشهر اخذ النقدية هانبه

عليها ماتهو يش الناحية دى .. مبسوطه؟ ..

**زوجه الأب:** اول الشهر لما الحبايب تتجمع مع بعضها ..

**الاب:** حبايب مين؟ ..

**زوجه الأب:** مراتك القديمه .. امها ..

**الاب:** وانى مالى ومالها .. دى واحدة بتروح لاجل

ما تتحصل على نصيبها هى الثانية ..

**زوجه الأب:** المثل بيقول القديمه تحلى ..

**الاب:** بقى اللى معاه القمر .. يبص فى وش اليوم .. ده

كلام ..

(اخيرا يتجه نحو الباب للخروج) ..

## المشهد السابع أمام منزل الاب

(حين يمضى الاب للخارج يلتقى امام المنزل مع الفتاة التى تجرى نحوه وتمسك بيده وتقبلها فى خوف)..

**الفتاة:** فينك يابا.. فينك.. جتلك كثير وما بلاقاكش..

**الاب:** فيه ايه يابت؟.. عايزه ايه؟..

**الفتاة:** خايفه يا بابا.. خايفه لبنتك تبقى سبب الطين اللى

ها يلطخ شالك.. وراسك تطاطى وسط الرجاله..

**الاب:** (يصفعها فى قسوة لتسقط على الارض عند قدميه باكية

وفى لهجة صارمة) منك انت شالى هايجيله الطين

يافاجره.. عيله ايه انت لاجل ماتعرفى الكلام ده..

**الفتاة:** الكلام ده عرفته بدرى صحيح .. بس ما بيديش حيله ..

شوفلى مكان تانى يابا اشتغل فيه .. خدنى عندك  
خداهم لمرتك حتى لحد رينا مايسهلها .. خدنى يابا ..

**الاب:** موش قادر اصدقك .. موش قادر .. معقوله عقلك

يستف الكلام ده كله .. **(ثم بعد لحظه صمت)**

يكونش يابت الكلام ده اتعلمتيه من التلافزيون عند

اسيادك .. **(فجأة)** اسمعى .. انى هاجيلك واحقق فى

السهرايه دى .. والله فى سماه لو طلعتى كدابه لاکون

قاتلك وشارب من دمك .. فزى قرومى على

هناك .. قرومى

**الفتاة:** ارجعلهم تانى ..

**الاب:** ايوه ترجعيلهم وتقوليلهم يسامحوك .. ياللا .

**(تنهض منكسرة وتتوقف لتواجه الاب بنظرات عتاب)**

**واسف) ..**

**الفتاة:** ما تعوقشى يابا .. احب على يدك .. ما تعوقشى ..

**الاب:** قلتلك روحي وانى جاى ..

**اطلام**

## المشهد الثامن منزل المخدم

(بضياء الديكور هنا حيث يقف الشاب ينتظر قدوم الفتاة

التي تدخل بالفعل فينصرف إلى قراءة كتاب بيده) ..

**الشاب:** (دون اكعراث بالفتاة) بالمناسبة .. مافيش حد في

البيت .. كلهم خرجوا ..

**الفتاة:** يعنى انى وانت دلوقت وحدينا ..

**الشاب:** حبيت أديك فكره .. جايز الحكاياه دى تريحك

وتخليكى تشاورى عقلك ..

**الفتاة:** اخرس ..

**الشاب:** خرسنا .. ولو جدعه ماتناميش الليله .. لانى بصراحه

كده .. موش ناوى على خير .. ماشى ؟

اعلام



## المشهد التاسع منزل الام

(يضاء الديكور حيث الام التى تجلس بجانب

زوجها الذى يجلس فى استرخاء وهيام) ..

الام: (فى دلال) انت هاتفضل قاعد جارى كده على  
طول ..

زوج الأم: عاوزانى اعمل ايه ..

الام: ولا حاجة يا أول بختى ..

زوج الأم: صدق الكلمه دى ..

الام: صدق .. وانت ..

زوج الأم: الراجل مننا لما يعشق الحرمة يبقى على الدنيا السلام ..

وآنى عاشق .. غرقان فى العشق لشوشتى ..

**الام:** والعاشق مايسبش وليفته تشوف حالها ..

**زوج الأم:** برضه مصممه تروحي لبنتك بكره زى مابتقولى ..

**الام:** عاوزه ارواح لاجل ما أبطل حجتها واعقلها .. وبالمرة

اجيب الشهريه ..

**زوج الأم:** (فى ضيق) الشهريه اللى بيقاسمك فيها

المحروس ..

**الام:** هاعمله ايه .. كل ماتيجى السيره يقولى زى ماهى

بنتك بنتى انا كمان ..

**زوج الأم:** إلهى يجيله خابط ..

**الام:** (فى دلع) الخابط جاله من يوم ماظهرتلى يا سبع

الليل (ثم وهى تنهض) ارواح اقفل الباب واجى ..

**زوج الأم:** بسرعه يا سنيوره ..

**(المرأة تنهض وتجه نحو الباب لتفاجئ بالفتاة)**

**امامها فيبدو عليها الضيق) ..**

**الام:** تانى جيتى ياوش النحس .. انى مش قلتلك

جياالك ..

**الفتاة:** صدق يا مه .. صحيح كنت جياالى ..

**الام:** عاوزانى اجيلك وش الفجر ..

**الفتاة:** وش الفجر ده ايه .. الليل لسه فى اوله ..



**الام:** خلاصه الكلام .. نعم

**الفتاة:** محتاجالك يا مه ..

**الام:** ما قلتلك جياالك ..

**الفتاة:** الوقت بيجرى بى ..

**الام:** ياريتہ كان قطر سكه حديد ويدوس على رقبتك ..

**الفتاة:** ياريت .. ياريت لاجل ماترتاحوا كلاتكم ..

**الام:** بطلی دوشه واتفضلی روحی والصبح انی جياالك ..

فارقینی بقی ..

**الفتاة:** (فی انکسار) حاضر هافارقك ..

**اظلام**



## المشهد العاشر منزل المخدوم

(بضاء الديكور ويظلم المسرح كله حيث تدخل  
الفتاة ويستقبلها الشاب فاتحا ذراعيه .. الفتاة تنظر  
حولها فلا تجد أحدا خلفها) ..

**الشاب:** قلتك البيت فاضى .. وانا فاضى .. وللاسف موش  
قادره تفهمى .. بالذمه انا مش احسن من اللى  
بتروحيلهم .. انا هاديكى الحنيه على اصولها ..  
هبسطك وادلحك .. ومن هنا ورايح موش هاخليكى  
تعملى جنس حاجه وحدك .. هاكنس معاكى ..  
وامسح معاكى .. واغسل معاكى .. ايه رأيك ..  
ياللا ..

**الفتاة:** (وهي تنظر له في استسلام وتخطم وتندفع نحو الشاب وتلقى بنفسها بين احضانه ثم هاهي تطعنه بخنجر في يدها في ظهره ليسقط ارضا) ياللا..

**الشاب:** (وهو يعاني من سكرات الموت) كنت فاكرا ان مافيش قدامك ولا بديل.. لحد ما اخترتني بديل.. عمره ماجه على بالي..

**الفتاة:** دلوقت الزباله دي مين يشيلها.. فين صاحبك الكناس عشان يكنس.. فين هو.. فين.. (تبكي وتسقط ارضا)..

(يدخل الاب كما تدخل الام ويقتربان من الفتاة التي تجلس القرفصاء بجانب جثه الشاب وهي تعاني من رجفه اصابتها وشيء من الهستيريا) قتلتيه..

**الأم:**

**الفتاة:** ده أول واحد..

**الاب:** والثاني هيكون مين انشاء الله..

**الفتاة:** (وهي ترمقه بنظره احتقار) كل راجل يشبهله هاقته..

(اظلام تام بالمرشح ويسلط ضوء مركز على اللوحه الخلفية)

**موت:** حكمت المحكمه حضوريا على الطفله المتهمه فى  
جريمه قتل مخدومها الشاب بايداعها دار  
الاصلاحية لعدم بلوغها السن القانونى لقيام  
الدعوى الجنائيه ضدها .. رفعت الجلسة ..

**(بضاء المسرح كله ونرى الفتاة وهى تقف مرفوعة  
الرأس قويه وشامخه) ..**

**الفتاة:** قلت لفضيله القاضى قبل ما يحكم لو كان حصلى  
الى البك عايزه .. يا ترى كان هايبقى مكانى  
ويتحاسب زى ما انى اتحاسبت .. وطلعت عيني  
ما سمعنيش لأن ما حصلش .. ماسمعنيش .. معناته  
كان لازم اضيع لاجل مايسمعني .. ولو سمعني  
ساعتها وطبطب على كنت ها عمل ايه .. وأروح  
فين بعديها .. كنت اقتل نفسى .. ولا أمشى فى  
سكه ما تشرفش .. ينهشى كل كلب بفלו سه ..  
واترمى فى حزن كل ديب بلقمتى وتتوه حقيقه  
بنت دافعت عن شرفها وشرف أهل مايشفروش ..

**ص/ النساء يفتنين:** قولوا لابوها ان كان جعان يتعشى .. الخ ..

**اظلام تدريجى مع نزول الستار**



## المداولة الثالثة





## المنظر

قاعة المحكمة يسودها الظلام ورغم ذلك نتبين في ضوء خافت الديكور المعد وهو كالتالى:

١- من يمين المسرح

منصه القضاء التقليدية ذات الثلاثة مقاعد فى المنتصف ثم فى أقصى اليمين منصه ممثل الادعاء .

٢- من يسار المسرح :

مقاعد للجمهور ذات مستويين :

أ- المستوى الاعلى به مقاعد فخمة ومزينة بشكل يوحى بزينة أعياد الميلاد للاطفال ونلاحظ يافطه كتب عليها (الناس الغلابه) .

ب- المستوى الأدنى ليس به مقاعد على الإطلاق ..  
ومغطى بطبقه من الخيش ويبدو الشكل العام لهذا  
المستوى بسيطا وفقيرا إلى أبعد الحدود حتى  
اليافطة التي تعلوه عبارته عن ورقه ممزقة كتب عليها  
(الناس المفتريه) ..

٣- فى منتصف المسرح :

قفص الاتهام وهو عبارته عن قفص عصفور كبير لا  
يتسع لرجل أن يجلس به بل لـ .. يقف فقط وما يتبع  
ذلك من حركه لأداء الممثل بالمسرحية .

## المشهد الأول

(يتقدم المتهم وهو مكبل بالأغلال ومن خلفه  
الهندي الذي يمسك بلمبة جاز وعصا كبيرة غليظة  
ليسطع الضوء في جنبات المسرح.. المتهم رجل رث  
الثياب رقيق الحال ولكن تبدو عليه علامات القوة  
والذكاء.. اما الهندي فيرتدى ملابس السهرة  
(الاسموكن) وهو رجل مسن في حاجة لمن يأخذ  
بيده.. ورغم ذلك يحاول ان يظهر سيطرته  
على المتهم الذي ينظر له في عطف وشفقة).

الهندي: خش يا مزور.. يا مجرم يا للى اسمك بلاص خش  
على القفص..

**المتهم:** بالراحة على نفسك يا شاويش .. لابعدين تفك ..  
بالراحة ..

**الجندي:** خش ..

**المتهم:** إفتحلى وأنا أخش ..

**الجندي:** خد المفاتيح اهه .. افتح .. واقفل على نفسك ..  
وبعدين اديهو ملي ..

**المتهم:** فين هي المفاتيح ؟ ..

**الجندي:** يا اخى اصبر لما اريح شويه .. هو ما فيش حلم ..

**(يجلس الجندي ارضا ويعبث في جيوبه بحثا عن  
المفاتيح) ..**

**المتهم:** آجى اساعدك ..

**الجندي:** تساعدنى .. قالوك عليه أكتع ولا مكسح ولا  
مكحكح **(يسعل)** الصحة عال والحمد لله ..

والقوة ما تقولش عليها .. احنا اللي قالوا علينا  
بنجيب التايهه .. ونعدل المايله **(فجأة)** ميل ياللا  
وخذ بايدى خلينى اقف .. وقفت الميه فى زورك ..

**(المتهم يساعد الجندي فى الوقوف حيث يبدو ان  
الجندي وجد المفتاح اخيرا فى إحدى جيوبه ويقبض  
بيده بشدة على شيء ما) ..**

**الجندي:** أهه .. ياما انت كريم يارب ..

**المتهم:** هات يا شاويش ..

**(الجندي يفتح يده الفارغه ويقذف فى الهواء بما داخلها) ..**

**الجندي:** ألقف بقى .. ألقف ..

**المتهم:** (فى ضيق) ألقف ايه ؟ ..

**الجندي:** المفتاح ..

**المتهم:** أنهى مفتاح ؟ ..

**الجندي:** كده ضيعته ..

**المتهم:** انت كان فى ايدك حاجه ؟ ..

**الجندي:** مش شفتنى وانا باحدفه ..

**المتهم:** ايه اللى حدفته ده ؟

**الجندي:** س سؤال .. باب القفص علشان يتفتح موش لازم يكونله مفتاح ..

**المتهم:** مضبوط ..

**الجندي:** وانا قعدت أدور عليه قدامك ..

**المتهم:** حصل ..

**الجندي:** وبعدين قلتلك ألقفه ..

**المتهم:** تمام ..

**الهندي:** تبقى خدته وديته فين؟ ..

**المتهم:** يا عالم .. انت عاوز تجننى .. حرام عليك يا اخى ..

موش كفايه النصيبة اللى انا فيها .. عايز تلبسنى

تهمة تانيه .. ده انا عندى كوم عيال ..

**الهندي:** عارف عقوبه سرقة مفتاح القفص قد ايه ..

**المتهم:** لا ماعرفش ..

**الهندي:** بتاع ييجى متين سنة ..

**المتهم:** متين سنة؟ ..

**الهندي:** ده على الاقل .. ادخل القفص يالا من غير مفتاح

لحد ما نلاقيه ونبقى نفتحه من اول وجديد ..

خش ..

**(المتهم يتقدم نحو القفص ويحاول برفق ان يفتح**

**الباب الذى ليس له قفل ولا مفتاح اصلا فتبدو عليه**

**الدهشه) ..**

**المتهم:** ايه رأيك بقى ان القفص لا له لا قفل ولا مفتاح ..

**الهندي:** ومين قالك انه بيتسك من اساسه .. انت هاتدعى

على شىء ما حصلش .

**المتهم:** انا هادعى ..

**الهندي:** عارف عقوبة اللى يدعى على الشاويش تبقى ايه ..

**المتهم:** خمسميت سنة ..

**الهندي:** لا .. حبس انفراد لغاية الوريث الثالث ما يموت او  
تجيله داهيه تشيله ..

**المتهم:** أحسن حاجة ان الواحد ما يفتحش بقه نهائي ..

**الهنديك** واللى ما يفتحش بقه هنا يعاقب بالاعدام ..

**(المتهم يفتح فمه فى بلاهه فى محاولة أن ينجو من  
مثل هذه العقوبة) .**

**الهندي:** واللى يعمد كده يبقى أهبل ..

**المتهم:** بسيطه دى نتحملها ..

**الهندي:** عقوبة الهبل عندنا خمسين جلده الصبح وخمسين  
زيهم قبل النوم .

**المتهم:** طيب قوللى اعمل ايه انا فى عرضك ..

**الهندي:** اللى يقع فى عرضك الشاويش عقوبتها ..

**المتهم:** (يقاطع الهندي بشق جلابه إلى المنتصف تقريبا  
وفى جنون) مرتاح كده ..

**الهندي:** برضه ليها عقوبه فى القانون ..

**المتهم:** عقوبة ولا موش عقوبه .. انا بقى فقدت .. ولا عاد  
هامنى شنق ولا جلد .. انت عاوز منى ايه يا راجل  
انت .. عاوز منى ايه ..

(المتهم يفتح القفص ويتقدم نحو الجندى فى تروعد  
فى الوقت الذى يتراجع فيه الجندى للخلف الى ان  
يختفى ونهاثيا من المسرح .. ليفاجأ المتهم بظهور  
اغمامى الذى يواجهه فى تحدى وقوة) ..

اغمامى: انت المدعو بلاص ..

المتهم: ايوه انا ..

اغمامى: ايه العمائل السوده دى اللى عاملها مع الشاويش ..

المتهم: تبقى مين بسلامتك ؟ ..

اغمامى: انا اغمامى بتاعك يا حبيبى .. انا اللى المحكمة

جابتنى علشان ادافع عنك لانك فقير ومش لاقى

تاكل .. وبالاامارة صايع وضايع ومالكش ضرر

يسندك .. صح ..

المتهم: كل اللى سيادتك قلته صح ماعدا حاجة واحدة ..

اغمامى: اللى هى ؟ ..

المتهم: انى صايع ..

اغمامى: قوللى .. بتشتغل ايه ؟ ..

المتهم: ولا حاجة ..

اغمامى: تبقي ايه ؟ ..

المتهم: موش ذنبى انى موش لاقى شغل ..



**المُهامي:** شوف يا بلاص (يتوقف فجأة) الاول حاول ترجع

القفص وبسرعة .. لبعدين تدخل فى قضية تانيه

غير قضية التزوير اللى انت زورته فى اسم ابنك ..

**المتهم:** انا لामزور ولا مجرم ولا اى شىء من اللى انت بتقوله ..

**المُهامي:** لأ .. انت مجرم ومزور وقررى كمان .. بقى تعمل

اللى عملته ده .. وتقولى موش مجرم .. لا مجرم ..

**المتهم:** تقدر تفهمنى بالضبط الحكمة دى مقوماك معايا ولا

على ..

**المُهامي:** معاك طبعا ..

**المتهم:** طيب ازاى تقوللى مجرم والمتهم برىء لحد ماثبت

ادانته (وهو يتقدم فى نفس التواعد السابق مع

الجندي نحو المُهامي الذى يقلد باصبعه المسدس فى

وجه المتهم) انا بقى هاعمل فيك عاهه علشان ابقى

مجرم على حق واشيل قضية على حق .. تعالى ..

**المُهامي:** أى حركة منك هضرب فى المليون .. انت فاكـر

نفسك فين دى محكمة يا له .. ويكون فى علمك

الحركة اللى عملتها دى اقل حاجه فيها دبح .. فاهم

يعنى ايه دبح .. طبعا ماتعرفوش لانك عمرك ما

دبحت فرخه ولا شويتها حتى .. علشان انت من

المعدمين .. الدبح ده معرفة الاغنيا اللي زى  
حالاتى .. من ايام ما كان الغنى منا بيتغدى بأسد  
ويتعشى بمراته .. او عى تقول كلمة لاخلص  
عليك ..

**المهم:** لاحول ولا قوة الا بالله .. لاحول ولا قوة الا بالله ..  
باقول ايه يا اسطى ..

**الهامي:** اسطى ؟ ..

**المهم:** استقراطى يا سيدى ماتز علش .. شوف انا هادخل  
القفص علشان انا مجرم زى ما بتقول .. ماشى ..

**الهامي:** ماشى ..

**المهم:** وانت تطلع من هنا عشان انت ضلالى زى انا ما  
باقول ..

**الهامي:** انا .. ضلالى ؟ ..

**المهم:** والضلالين عن المجرمين ما يتخيروش ..

**الهامي:** لا انا موش زيك .. لا .. انت حاجة وانا حاجة ..

انت من طينه وانا من عجينه .. انا هنا وجودى  
لسبب انى ادافع عنك .. بمزاجك او من غير  
مزاجك هادافع .. ده روتين .. روتين .. فهمت ولا  
نقولها تانى .. (ثم فى لهجة أمره) ياللا اتفضل

خش القفص عشان اسألك كام سؤال لزوم  
الشغل .. اسمك ؟ ..

**المتهم :** بلاص ابن زلعه ابن ماجور المدألج ..

**الهامي :** تمام الاسم .. البيانات اللى جمعتها عنك كلها ما  
تخرش الميه **(ثم فى طريقه سريعة)** انت صحيح  
اصلك واطى ؟ ومن عيله واطيه وبيئة واطيه ..  
ومهنة العيله كلها زبالين ؟ ..

**المتهم :** مالهم الزبالين ؟ ..

**الهامي :** **(فى سعادة)** التقارير لغاية دلوقت ماشيه عال ..  
تقدر تقوللى آخر مرة خلفت عيل .. هل كنت فى  
كامل قواك العقلية ؟ ..

**المتهم :** هو خلفه العيل عندكم بتيجى بالعقل ..

**الهامي :** معلوماتى كده ..

**المتهم :** **(بلهجة أسف)** الاغنيا دول مساكين بشكل !

**الهامي :** احنا مساكين يا متخلف ..

**المتهم :** المتخلف اللى بيتهياؤه ان الخلف ييجى بعقله ..

**الهامي :** امال بايه ؟ ..

**المتهم :** احنا فى محكمة .. عيب ..

**الهامي :** وبتعترف صراحة إنك موش منظمها ..

**المتهم:** ايه دى اللي انظمها ..

**الهامي:** الحبوب يا افندى ..

**المتهم:** يا راجل انت انا راجل حبوب ايه ده اللي انظمها ..

انت منظمها ..

**الهامي:** (بلهه اسف) . ورغم كده .. الحمل حصل ..

**المتهم:** طيب ماتاخذ حاجه تنزله ..

**الهامي:** انزل ايه ؟ ..

**المتهم:** العيل بدل الفضيحه ..

**الهامي:** موش انا اللي حامل يا حيوان ..

**المتهم:** امال مين ؟ ..

**الهامي:** البيت يابنى آدم .. ومليون مرة اقول الحبة

ماتتنسش .. واهى اتنست والكارثة حصلت ..

**المتهم:** انا داخل القفص ..

**الهامي:** خليك ..

**المتهم:** لا ياعم .. حاجة تنسى تانى وساعتها موش

هايلاقوا غيرى يشيلها .. بلاش ..

**(المتهم يمضى نحو القفص ويدخل ويغلق الباب**

**خلفه فى حرص شديد)**

**الهامي:** (متجاوزا) قوللى بسرعة قبل هيئة المحكمة ما

تنعتقد .. انا اصلى يادوبك قريرت القضية بتاعتك  
وانا طالع على السلم .. انت ليه زورت فى اوراق  
رسمية وبالتحديد فى شهادة ميلاد ابنك خيشه ..

**المتهم:** طيش ..

**الهامي:** لاموش طيش .. سميت ابنك ليه باسم تانى موش  
من حقه ..

**المتهم:** هيل ..

**الهامي:** انت عارف عقوبة الهبل ايه ؟ ..

**المتهم:** تانى هاتقوللى عقوبة الهبل ..

**الهامي:** هو فيه حد غيرى قالهالك ..

**المتهم:** كتير .. بس أنا لى مزاج اسمعها منك عشان انت  
الهامى بتاعى ..

**الهامي:** شوف يا بلاص .. حتى لو كنت جاهل بالقانون ..

الكلام ده برضه مش فى صفك .. انت رحت

للنهاية برجليك .. واقل ما فيها .. ويوم ما يكون

القاضى مزاجى رايق .. وفيه عضمه جامدة كلمته ..

علشانك هايديلك اعدام ..

**المتهم:** (بلهجة تفاؤل) ربنا يفرحك .. ريحت قلبى الله يا

شيخ ..

**الغامي:** ما تفرحش قوى ده حكم بسيط هايحكم عليك  
بيه فى اول درجة .. لكن فى الاستئناف والنقض  
الحكم هايعلى ويبقى حاجه تانيه . تبسطك اكر  
واكر . ايه اللي دفعك لكده ..

**المتهم:** محدش دفعلى حاجه ..

**الغامي:** يا غبى .. دفعك شىء ودفعلك شىء تانى .. افهم ..

**المتهم:** لا عندك .. كله كوم والشتمه كوم .. رغم انى ممكن  
اعديها واقول القبيح يشتم الباشا لكن لأ .. الباشا  
هيشتم القبيح ويهزأه ..

**الغامي:** حسن ملافظك بعدين انسحب من قضيتك  
واخنقك ..

**المتهم:** طظ فى انسحابك .. تفتكر انى من غيرك هاضيع  
اكر ما انا ضايع .. ولا يعنى موش هاعرف اهجص  
بكam بق من اللي بتقولهم وتسلك القوشينات طظ  
فيك وفى دفاعك ..

**الغامي:** (فى تواعد) طيب يا بلاص يان بن زلعه يابن  
ماجور .. ان ماوريتك .. وحياتك اللي هاتعدمها  
بدرى لسخن عليك المحكمة واشهد ضدك واقول  
انك مزور ومجرم مع سبق الاصرار والترصد ..

**المتهم:** حتى لو كنت ها أبجك عشر تلاف برانى بعيد عن  
الملاليم اللي هايدوهو ملك ..

**الهامي:** انت حيلتك حاجة

**المتهم:** موش انا مجرم زى ما بتقول ..

**الهامي:** مجرم ومنحط وواطى واهلك كلهم دون ..

**المتهم:** طب الواطى أبو اهل دون ما يعرفش يتصرف فى

مبلغ هفيه زى ده .. هى الفلوس اللي مالهاش

حساب النهارده موش ما بقتش تجرى الا فى ايد

بتوع الماكس والبانجو والبودره والعالم الهليبه ..

**الهامي:** (مفكرا) مضبوط .. مضبوط كلامك يا منحط ..

والمبلغ اللي بتقول عليه ده جاهز ؟ ..

**المتهم:** ورهن الاشارة ..

**الهامي:** يبقى انا خلاص قررت اترافع عنك بدمه يا صايع يا

متشرد يا حقير ..

**المتهم:** (فى تعجب) هايترافع ده ولا هايتواطى ؟ ..

**الهامي:** حبه فوق وحبه تحت يا محترم .. انت ما سمعتش

قانون عدويه ومذكرته التفسيرية المعروفة بالسح

الدح امبو ...

**الجندي:** (وهو يدخل مسرعا ويشير بيده الى من يتبعوه ان

يتقدموا مسرعين) بسرعة لحسن الجلسه هاتبدأ  
خلاص .. اتفضلوا يا اكابر .. اتفضلوا يا غلابة يا  
مظلومين ..

(تدخل مجموعة من ثلاث رجال وتبدو هيئتهم انهم  
من علية القوم وهم يتجهون الى المستوى الاعلى  
ليجلسوا فى تفرز شديد تحت يافظه الغلابة) ..

المجندي: (وهو ينادى) ياللا .. الصيع يدخلوا يجلسوا  
وتنهم قيام جلوس .. قيام جلوس لحد الجلسه ما  
تنتهى .. خشوا ..

(يدخل المسرح رجلين ومعهم امرأة تحمل طفلا  
رضيعا ونلاحظ ان ثيابهم رثة وقذرة للغاية  
ويتجهون نحو بلاص فى القفص لتحيته وهم  
شلضم ويبيع وأم خيشه زوجة المتهم) ..

شلضم: ازيك يا بلاص .. قدره اخوك اللى فى بلاد بره  
باعلك السلام .. وبيقولك انه قرب يلم زباله  
العالم وجاى يفتح بيها مشروع كبير .. ومسميه  
خرابه مول ..

بلاص: فيك الخير يا ابو الشلاضم ..

ببيع: كلنا معاك يا بلاص ..



**بـلاص:** تسلم يا ببع (ثم وهو ينظر إلى زوجته التي تنظر له فى لهفة واشتياق كبير) عامله ايه يا ام خيشه...؟

**ام خيشة:** هاعمل ايه وبلاص بعيد عنى .. من يوم ما اتحبست وانا عماله ألف فى الشوارع زى الشحاتين .. امتى بقى تخرج وتحميلنا امتى .. عيالك مشتاقينلك .. وانا كمان مشتقالك وقربت أمل .. يا ده الرصيف من غيرك وحش بشكل ..

**بـلاص:** ادعيلى ربنا يخرجنا منها على خير .. وموش هاوصيك خللى بالك من العيال قوى وغطيههم الكرتون اللى جاييهالك من المهندسين ..

**(فى المستوى الاعلى يقف أحد الرجال معترضاً ويشير إلى ما يحدث امام قفص الاتهام لزملاءه حيث يتم الحديث التالى) ..**

**شـريف:** ده كلام يا ساده .. الناس دى سايبنها كده تتكلم براحتها جوه المحكمة صدق من قال يبقى القانون مننا .. والحق حقنا .. وييجوا الـ .. صيع يقعدوا على قلبنا .. عجبى ..

**مـنـر:** هدى نفسك يا شريف بك .. هدى نفسك ..

جرحك لسه جديد وعملية البواسير موش كل يوم  
هتعملها ..

**شريف :** والله يا منير بك هتنقط من حال البلد دى (ثم وهو  
ينظر إلى الثالث صبرى) ولا انت موش معايا يا  
متر ؟ ..

**صبرى :** انا مستنى بس لما المحاكمة تبدأ .. وهاتشوف انا هاعمل  
ايه .. سيادتك اكيد سمعت الكلمة اللي بتتقال عنى  
فى المحاكم .. بص شوف صبرى بيعمل ايه .. هو انا  
محامى سهل ولا عمرى كسبت قضيه ..  
**شريف :** (فى قلق) ايه ؟ ..

**صبرى :** قصدى اقول انى عمرى ما خسرت قضيه .. ؟  
**شريف :** وعشان كده انا وكلتك .. وعشان كده انا دفعتلك  
كل اللي قلت عليه .. وعشان كده لو ما جبتليش  
حقى .. هارفع عليك قضيه نفقه انا والمدام  
والاولاد .. لانك اخدت كل اللي حيلتنا من أول  
الاطيان لحد الكرتة والشاليه اللي فى مارينا ..

**الجندي :** (صارخا فجأه) محكمة .. حكمت المحكمة  
حضوريا .. (ثم بعدارك) لامؤاخذه دى اللي  
هايقولها القاضى فى الآخر .. محكمة ..

(تدخل هيئة المحكمة وعلى وجوههم ألقمة  
لشخصيات شهيرة: القرصان ودراكيولا ومهرج  
السيرك.. وكما يدخل ممثل الادعاء وهو بلبس  
الانسان الاول التقليدية ويده العظمة الشهيرة  
ويتجه هو الآخر الى مقعده.. ولتحديد  
الشخصيات فإن دراكيولا هو القاضى.. والقرصان  
المستشار اليمين.. والمهرج مستشار اليسار)..

**القاضى:** ياللا.. فتحنا الجلسة وعاوزين نشوف دم.. الادعاء  
جاهز؟..

**الادعاء:** جاهز وآخر حلاوة.. وكله فى السليم..

**القاضى:** محامى العالم النكد موجود؟..

**محامى ١:** موجود يا سيادة القاضى..

**القاضى:** محامى الناس الغلابة موجود؟..

**مهرى:** محسوبك يا باشا موجود..

**القاضى:** خش على الشغل بسرعه.. علشان انا والزملا

مستعجلين (وهو يشير للممثل الادعاء)..

**الادعاء:** سيادة القاضى.. حضرات المستشارين.. انه فى

اليوم الاول من محرم الموافق..

**القاضى:** (فى ضيق) انت هتحكىلى قصة.. بقولك مستعجلين..

**الادعاء:** (فى استعمال للقاضى) عفوا سيدى القاضى .. انه

فى اليوم الاول

**القاضى:** هايرجع يقوللى تانى الموافق .. ايه رأيك بقى انى انا

مش موافق .. خللص ..

**الادعاء:** انه فى اليوم ..

**القاضى:** (محدرا) ها ..

**الادعاء:** انه فى يوم سبعة اغسطس الموافق الاول من محرم ..

**القاضى:** على النعمة احبسك .. ده آخر تحذير لىك .. خش

عدل فى الموضوع ..

**الادعاء:** فى هذا اليوم المعين اللى جنابك مضايق منه ..

تطاولت يد هذا المجرم المائل امام حضراتكم كأنه

قطه .. للعبث والتزوير فى اوراق رسمية .. لقد

أنجب هذا المجرم ولدا وتوجه به إلى مكتب صرف

الاسماء للمنحطين من أمثاله فاعطى له اسم خيشه

ليكون اسم الطفل خيشه بلاص ابن زلعه ابن ماجور

المدألج .. لكن المجرم لم يرضى بشرعية هذا الاسم

وتوجه ليلا جلسه الى مكتب صرف اسماء المرتاحين

بحثا عن اسم يلطشه ويشاء القدر ان تطال يده اسم

شريف .. شريف بك يا سادة .. شريف بك رجل

المال والاعمال والدولار.. ولم يكتفى بذلك.. بل حاول ان يزور فى الاوراق الرسمية ليغير اسمه ابنه خيشه الى شريف بك.. وقد يظن البعض ان جرائمه قد انتهت الى هذا الحد.. بل لقد شرع ايضا بتفكيره الدنىء ان يغير تبعاً لتغير اسم ابنه.. اسمه هو حتى يضمن له مستقبل مرموقاً بالحصول على مؤهل علمى لا ينسجم ولا يطابق مثل هؤلاء الزمره من المجرمين.. لقد فكر يا سادة ان يكون مستقبل هذا الطفل موظف دوبييا فى إحدى الوزارات **(وبعد كلمات الاستعكار من المستوى الاعلى وحركات تفززم)** سادتى.. ان الجريمة ليس لها حدود كما تعلمون.. فالذى يسرق البيضة يسرق الفرخة.. ولا يعوقه حتى انفلونزا الطيور.. موش مهم.. لقد حاول السيد شريف الحى عليه ان يستعيد اسمه بكافة الطرق والوسائل.. لكن المجرم أبى.. أبى وطنش.. وهذا أنيل ما فى الموضوع.. أبى أن يعيد الاسم المسروق أو أن يرضع ابنه بوليس نجده وتنتهى المشكلة.. هل هذا عدل؟.. أليس هناك قانون يحمى الاسماء والعائلات؟.. أليس هناك عقوبة

اكثـر من الدلـله علـى حبل المشنقة .. اننى اطالب  
 بتوقيع أقصى العقوبة على المتهم .. انشالله يموت  
 ألف مرة .. برضه موش هيشفى غليلى .. انا  
 بصراحة عاوز جنازه واشبع فيها لطم .. عايز ارتاح  
 لانى تعبـان .. احنا فين هنا .. **(يتمالك نفسه)**  
 سادتى عليكم بانقاد الناس الغابة من يد المفتريين ..  
 فما ذنب الاجيال القادمة من المرتاحين حين تنتهى  
 الاسماء المحترمة بالسرقة والتدليس ولا يجدوا  
 امامهم غير اسماء قذرة مثل بعبع وشلضم وبلاص  
 وقدره وما شابه ذلك من العاهات .. ما ذنبهم ..

**شلضم :** **(للادعاء)** انت بتجيب سيرتى ليه يا جدع انت ؟ ..

**القاضي :** مين اللى اتكلم ؟ ..

**شلضم :** انا يا سيادة القاضي ..

**القاضي :** انت مين ؟ ..

**شلضم :** انا شلضم هلضم المكدم ..

**القاضي :** شلضم هلضم المكدم .. اسمك عار ..

**شلضم :** عار ليه يا بك ؟ ..

**القاضي :** وهاحبسك عشر سنين لانك فتحت بقك بدون

اذن .. خده يا عسكرى ..

**شلضم:** برىء يا عالم .. برىء يا خلق .. برىء ربنا  
يهدكم ..

**(الهندي يتقدم ويدفع بشلضم الى الخارج حيث  
يسود الهدوء المسرح نسبيا ثم يدخل الهندي وهو  
ينفض يده) ..**

**القاضي:** وديته جنب النابت بتاعى علشان اسهر الليله  
عليه .. ؟

**الهندي:** طبعاً يا باشا **(ثم جانباً)** ده احنا لو ما وردناش  
عشوه الليله هاييجى علينا الدور ..

**القاضي:** محامى المجنى عليه يقوم يحامى .. ياللا ..

**صبري:** **(وهو يتقدم نحو هيئة المحكمة ويحمل ورقة كبيرة  
جدا ليقرأ منها وصارخاً)** غير مجد فى مللتى  
واعتقادى .. نوح باك ولا ترنم شادى . وشبيه صوت  
النعى اذا قيس بصوت البشير فى كل تاد ..

**القاضي:** نادى ايه ؟ ..

**الحامى:** أى نادى من اللى بياخدوا الدورى .. كلهم  
حلوين .. بهذا يا سيدى القاضى وصحبته .. أفتتح  
بمشيئة الله دفاعنا فى هذه الواقعة الاجرامية .. اننى  
هنا لا ادافع فقط عن السيد شريف الاصلى .. بل

ادافع عن كل الغلبة .. ان السيد شريف الاصلى هو  
الاصلى كما تعلمون .. وحاكم اصلى وفصلى  
كلهم من بعض خيركم وانتوا عارفين .

**القاضي:** اختصر ..

**الهامي:** ان موكلى يا سادة من الناس التمام قوى .. عنده

بدل البدلة خمسين .. وبدل القميص ستين .. وربنا  
يديله كمان وكمان .. المهم سأقص على عدالتكم  
القضية وانتوا بقى تشوفوا وتحكموا بمزاجكم **(ثم وهو يركض فى دائرة حول نفسه كما لعبه الاطفال**

**فى حدوده المتقلب)** يحكى أن .. أن ايه .. ان  
شريف .. شريف البيه .. قاعد مرة ولا عليه .. كله  
بلاص .. طب أكله فى ايه .. اكله فى اسمه الطمعان  
فيه وإداه لابنه يعليه بيه .. لاجل يخش لاسيه  
فرنسيه .. زعق نادى الناس حواليه .. عشرة  
ماجابوا موتور رجله .. شفت الاسم وسك عليه ..  
جم يقولوله ياعم فى ايه .. قال ده خيشه ونفسى  
فيه .. واذا كنتوا فهمتوا هاتعملوا ايه **(ثم وهو**  
**يلطم خديه أخيرا)** احيه .. احيه .. احيه ...

**القاضي:** **(قبل أن يعقب أحد)** اللى هيتكلم هلبسه قضيه ..



**مهرى:** ماشى لغاية كده ..

**القاضى:** ماشى ..

**مهرى:** هو ده اللى حصل ..

**القاضى:** ايه بقى اللى حصل ؟ ..

**مهرى:** (يغير لهجته خوفا من القاضى) انا باقول لحضرتك

ان موكل السيد شريف الأصلى مايقدرش يصرف

اسم بدل فاقد الا لما اللى سرق اسمه يموت .. فاذا

كان المتهم بلاص ابن زلعه ابن ماجور المدألج ناوى

على خير .. مافيش مانع يحدف نفسه من عاشر

دور ويخلصنا ..

**القاضى:** طب واحنا تبقي فايدتنا ايه .. (الى اghامى) ..

الدفاع عن المتهم .. (ثم عجلوا له) من غير يحكى

ان ...

**اghامى:** (وهو يقف مذعورا ويتقدم صوب القاضى فى

محاولة ان يهمس فى اذنه بشىء) .. لامن غير ..

بس فيه حاجة كده ..

**القاضى:** مافيش داعى للشرح .. المحكمة عارفة كل حاجة ..

**اghامى:** يعنى حضرتك فاهم وضعى وفاهم انى بادافع

غصب عنى ..

**القاضي:** مسأله اجراءات طلعو لنا فيها .. قال ايه حقوق الانسان ..

**الغامي:** (فرحا) يعنى مافيش أى ضرر على ..  
**القاضي:** لأ . مافيش ..

**الغامي:** حيث كده نبدأ نتحامى .. اقدملكم نفسى .. انا نبيل نبيل النبلاوى . من نبلاء كفر النبابيل .. وجارنا عدل جميل بك جميل الجملاوى .. من جملاء كفر الجماميل .. احنا يا سيادة القاضى مشبحين فى البلد وواصلين لكل حاجة تيجى على بالك .. وده ما جاش من فراغ .. احنا صحيح جدنا السابح كان اسمه المقشف .. لكن صمم واجتهد وجاب فلوس ماتعرفش منين ودفعها لمكتب صرف الاسامى واخذ اسم النبلاوى ومن خوفه عليه لايتسرق دقه على ذراعه اليمين وذراعه الشمال .. امى بتحكيلى ان الاسم ده كلفه ايام الرخص خمسين جنيه . جنيه يعيش جنيه .. باختصار انا نبيل نبيل النبلاوى من نبلاء كفر النبابيل تخصص فى المرافعة امام محاكم النط على الاسماء .. ومحاكم تنش الغسيل من على الحبال ومقدم طلب

عشان ياخدوني فى محاكم خراب البيوت .. عملية  
ماهياش سهله .. عموما موش هاطول عليكم وابدأ  
مرافعتى .. لقد عهد الى بان اكون محامى هذا المجرم  
**(يشير الى بلاص الذى يبدى بيده حركة للتوعد)**  
إننى اطالب بالحماية منه حتى أستطيع ان اكمل ما  
اصطلح عليه من سيادتكم باجراءات حموم  
الانسان ..

**القاضي:** حموم الانسان .. ياللا هو كله نضافه قبل ما يتاكل  
.. كمل يا استاذ ..

**بلاص:** اى كلمة اونطه هاتقولها .. هاقولهم اللى عندى ..  
**المحامي:** ايه اللى عندك يا اخويا ..

**بلاص:** عندى حكاية العشر تلاف جنيه .. بامارة ما انا  
مجرم ومنحط وواطى واهلى كلهم دون ..

**القاضي:** (وهو يعتدل فى جلسته ويتجه بوجهه ناحية بلاص  
ويهز رزسه فى ابتسامة تنم عن اصطياذ شىء ما)  
انت قلت ايه ؟ ..

**بلاص:** الكلام اللى قاله على وعلى اهلى ..

**القاضي:** الكلام موش مهم .. كلنا بنتشتم .. انا عاوز اعرف  
ايه حكاية العشر تلاف جنيه دول ..

**بلاص:** قالى انا عاوز عشر تلاف جنيه نظير انه يرشهم

عليكم عشان تدونى البراءة .. ولما قتلته اسلمهم انا  
بأيدي لعظمتكم رفض وقعد يشتم فى ..

**القاضي:** ماهو لازم يشتمك وينعل سنسفيلك ..

**بلاص:** علشان فهمت انها لعبة وحب يلطخ بيها

اساميكو ..

**القاضي:** لأ .. علشان كان هايدبهم فى جيبه ومش هاوصلنا

تعريفه ..

**الهامي:** انت بتصدقه يا سيادة القاضي ..

**القاضي:** اللى قاله لازم اصدقه فيه ..

**الهامي:** يعنى ايه ؟ ..

**القاضي:** يعنى فيه حاجات بتحصل هنا من ورا ضهرى .. وانا

ما عنديش علم .. ازاى الاحكمة ماتنورنيش

بالبكاوى اللى بتتحدف دى .. ازاى ..

**الهامي:** والله ده كان مجرد كلام ما وصلناش فيه حل ..

**القاضي:** الكلام كان ممكن يطبق لفعل .. للحاليج .. لأبويج

يا افوكاتو الغفلة .. (ثم بعد لحظة صمت) بقولك

اياه .. انت تستنى عند التابوت بتاعى قبل طلوع

الفجر بساعة .. فاهم ..

**(الهامي يبدو عليه الرعب وهو يرتجس رقبته  
خوفاً ويهز رأسه بالرفض) ..**

**القاضي:** ماسمعتش حاجه ..

**الهامي:** حاضر .. حاضر يابك .. ده انت لو هاتيحي على  
عيل من عيالي ادبحه واجيبه هديه لمعاليك ..

**القاضي:** ماليش فى العيال ..

**الهامي:** (جانبا) ناوى على يعانى ناوى على .. (ثم  
للقاضي) .. ممكن سيادتك تأذن لى بكلمة ..

**القاضي:** قول ..

**الهامي:** انا شايف ان موضوع المتهم ده فيه كثير من  
الملاسات .. لذلك ارجو من عدالة المحكمة تدينى  
وقت كافى للدفاع عنه او تعفينى منه خالص  
ونهاى ونبقى متشكرين .. سلام عليكم (ثم يمضى  
مسرعاً نحو باب القاعة) ..

**القاضي:** تعالى هنا .. هى وكالة .. رايح فين؟ ..

**الهامي:** مروح ..

**القاضي:** مروح؟ ..

**القرصان:** هو الموضوع ايه بالضبط .. انا من الصبح سامع كلام  
عمال يروح يمين وشمال ويقول يا واد كبير .. لما

نشوف اخر البيزنس هايوصل لايه .. لكن لأ .. انا  
بقى عاوز حقى وحالا .. يا امه حاقلبها دندره  
عليكم .. (ثم للمهرج) ماتكلم يا جدع انت ..  
قول حاجه .. ولا انت بس قاعدلى تضحكك على  
الفارغة والمليانة طول الجلسة (ثم فى صرامة)  
اتكلم ..

**المهرج:** اتكلم .. انا شايف يا جماعة اننا خرجنا عن  
الموضوع اللى احنا جايينله تماما .. انا من الصبح  
نفسى افهم القضية دى ايه واساسها ايه .. موش  
لاقى حد يدلنى .. (ثم لبلاص) هى المشكلة إيه يا  
أخ ..

**بلاص:** المشكلة بيقولوا انى سرقت من البك اسمه (يشير  
إلى شريف) ..

**المهرج:** (فى دهشة) معقول ؟ .. (ثم للمحامى) وانت هنا  
ليه يا حضرة ؟ ..

**اغمامي:** المحكمة معينانى ادافع عن المتهم ..

**المهرج:** وليه موش عاوز تكمل مرافعتك ..

**اغمامي:** هاتاكل يا باشا .. هاتاكل ..

**المهرج:** (للقاضى) ايه رأى سعادتك نأجل مسأله العشا

دلوقت لحد الجوع ما يترافع وبعدين كله براحتك ..

**القاضي:** حد قالك ان ميعاد العشاجه .. ده بيتلكك ..

وعموما **(للمحامى)** كمل مرافعتك علشان ما

تزعش العضو اللى موش فاهم حاجه ..

**(المحامى يعود الى حيث كان يقف امام القاضي وهو**

**ينظر لبلاص فى تواعد فى الوقت الذى ينظر فيه**

**بلاص له فى سخرية المنتصر) ..**

**المحامى:** كله منك .. كله منك .. الزنقة اللى زنقتهاالى دى

لازم يكون لها تمن .. انا بقى لعبتى الكلام

وهاوريك .. اسمع بقى البق ده **(ثم للقاضي)**

سيدى القاضي .. حضرات المستشارين .. هناك

جريمة اكيد .. وهناك متهم ومجنى عليه اكيد

الاكيد .. وهناك دليل وشهود اكيد الاكيد الاكيد

الموضوع دلوقت بيتلخص فى كلمتين اتنين ..

الراجل ده **(يشير الى بلاص)** لهف اسم الراجل ده

**(يشير الى شريف)** فالراجل ده **(يشير الى**

**شريف)** رفع قضية على الراجل ده **(يشير الى**

**بلاص)** لذلك فإن الراجل ده **(يشير الى بلاص)**

موضوعه اصبح مع الراجل ده **(يشير الى شريف)**

ولان الراجل ده (يشير الى شريف) هو الوحيد  
 اللى اضر من اللى عمله الراجل ده (يشير الى  
 بلاص) يبقى الراجل ده (يشير الى شريف) يحل  
 مشكلته مع الراجل ده (يشير الى بلاص) وعليه  
 فان الموضوع بالنسبة لنا كلنا منتهى .. لان الراجل  
 ده (يشير الى شريف) هو اللى هاعرف ياخذ حقه  
 من الراجل ده (يشير الى بلاص) وعلى رأى المثل  
 شيل ده من ده يرتاح ده عن ده .. وربنا يديكم  
 الصحة .. وكل عام وانتم بخير ..

**المدعي:** (للمحامي فى غيظ شديد) ايه الكلام الفارغ اللى

عمال تقوله ده يا بنى آدم (ثم للقاضى) يا سيادة

القاضى انا باطالب بدخول الراجل ده (يشير الى

الحامى) مكان الراجل ده (يشير لبلاص) لان

الراجل ده (يشير الى الحامى) لاقدر يفهم الراجل

ده (يشير للقمرمان) ولا الراجل ده (يشير

للمهرج) ولا الراجل ده (مشيرا للقاضى) ولا

الراجل ده (مشيرا لنفسه فى النهاية) ..

**بلاص:** (فرحا) يحيا العدل ..

**المدعي:** (للقاضى) سكتوا المجرم ده ..



**بلاص:** (المدعى) تموت فى السكوت .. عاوز الناس كلها

تخرص عشان يمشوا كلامك .. «ثم للجميع» صمت

لا بد يا جماعة

**القاضي مع صمت الجميع:** ياه هى المحكمة سكنت كده ليه .. انا تعبت .. الشمس

قربت تطلع .. وعازب اخش التابوت .. اى واحد فيكم

هايتكلم ها أخده معايا .. الراجل فيكم يفتح بقه ..

**ام خيشة:** جرى ايه ياعم القاضى .. هو احنا فين .. فى

مدرسه .. ما تسبب اللى يتكلم يتكلم (ثم وهى

**تشير الى المدعى)** الراجل ده ..

**القاضي:** باينها ليله موش فايته الليله دى .. تاني ده ؟

**ام خيشة:** موش هاقولها .. لكن هاقول انه بسلامته من ساعة ما

دخلنا وهو حاطط نقره من نقر جوزى .. زى ما يكون

جوز امه .. ولا التانى ده (تشير الى محامى شريف)

هو كمان مستصعب قوى على جوزى .. حتى اللى انتم

جايينه يدافع عنه هو كمان حاطط بلاص على دماغه

وزاقق .. هى ايه العبارة .. رباطيه دى ولا ايه ..

**القاضي:** حد أذلك تتكلمى ..

**ام خيشة:** انت موش هددت الرجالة وقلت ما يفتحوش

بقهم .. النسوان بقى تتكلم ..

**القاضي:** فين النسوان دى ؟ ..

**ام خيشة:** موش شايف ..

**القاضي:** بقولك فين ؟ ..

**بمبع:** (الذى يتحدث بلهجة وطريقة امرأة

**لعوب بعد ضحكة) بص هنا يا سيادة**

القاضى .. واتفرج علي المواهب

**القاضيك (لبيع) إنت ست ..**

**بمبع:** خدمتك واسمى ببيع ..

**(المهرج يضحك كثيرا حتى انه يضرب القاضي**

**بكفه فى مزاح بالغ ليستحبه علي الضحك) ..**

**القاضي:** فى ايه يا حضرة المستشار .. مالك ؟ ..

**المهرج:** يوه كتك ايه يا ببيع ..

**القاضي:** (بطريقة مريبة) هو ببيع ده ..

**المهرج:** كان معايا زمان بنسرح فى الموالد .. بس انا عديت

وهو لسه ماقدرش يا عينى يجيب فلوس ويغير

اسمه عشان يبقى افندى زينا ..

**القاضي:** وده اللي خلاه قلب ..

**المهرج:** موش عارف .. بس الغريبة ازاى إتحول قدمنا كده

وبدون تدخل جراحي

**بمبيع:** (للمهرج والحكمة تضح بالضحك) مالقاش معاك

خمسین جنيہ .. يا أخه عشان نسيت الفيزا في البيت

**المهرج:** خمسین جنيہ مرة واحدة يا ببيع ليه ؟ ..

**بمبيع:** اشترى هہ ..

**المهرج:** هہ ؟ ..

**بمبيع:** عشان أزودها علي الاسم اللي معايا ويقي بعبعه ..

**القاضي:** ده احنا ولا اللي بقينا في شارع الهرم .. اسمع يا

بيع انت ..

**بمبيع:** عيني يا حضرة القاضي ..

**القاضي:** عاوز ودنك موش عينك .. نظير الدوشه اللي

عملتها في المحكمة دى .. انت محبوس لحد ماتموت

أو تتاكل أيهما اقرب ..

**بمبيع:** اقول اللي في نفسى بقى مدام فيها خلصان ..

**المهرج:** قول يا ببيع يا جميل ..

**بمبيع:** (للمهرج) قول للراجل ده (يشير نحو القاضي)

يفرج عن الراجل ده (يشير لبلال) يفرج عنه

قوى ..

**المهرج:** اشمعنى ..

**بمبيع:** بحبه ومفيش داعى للاحراج .. مراته واقفه ..

**ام خيشة:** (بلهجة عتاب) ده كلام بالذمة يا بيع .. هو بلاص  
يغلى عليك .. انت تحبه .. انا احبه .. بلاص بلاصنا  
كلنا ..

**بمبع:** حيث كده خدى راحتك المحكمة بتاعتى (بشير  
للمهرج) ..

**ام خيشة:** يا عدالة القاضى .. هو حرام ان الواحد يبقى عاوز  
ابنه يكون احسن منه ؟ بدمتك انت موش عاوز  
ابنك يبقى احسن منك ..

**القاضى:** (باستهجان) يطلع قاضى يعنى وانا ابقى حته  
محامى واقف قدامه .. لأ طبعاً

**ام خيشة:** (فى انفعال) يا سيدى انشالله يطلع سباك .. المهم  
انه يسد الحنفية احسن منك .

**القاضى:** يسدها ؟

**ام خيشة:** ما علينا .. انا جوزى حب يطلع ابنه احسن منه ..  
تيجى ازاي ..

**القاضى:** ازاي ؟ ..

**ام خيشة:** من حال المبتدى احنا ما حلتناش أى حاجة نتسند  
عليها ..

**بلاص:** خشى فى المرافعة يا ام خيشه ما تضيعيش وقت ..

**ام خيشة:** سيدى القاضى واللى جنبك دول .. هل يمكن ان يكون لهذا الطفل الاعزل مستقبل فى ظل اسم خيشه .. لا بالطبع .. وذلك لسيطرة القوانين التى لا تتيح لتلك الشرذمة من البشر ان تجد لها مكاناً تحت الشمس .. فكان لابد من أحداث تغير جدرى وجوهرى كى تتناسب الأسماء مع التطورات ..

**المدعي:** (بطريقة الهمس للقاضى) الست دى بتتكلم فى السياسة .. قيد عندك

**ام خيشة:** هناك فارق كبير يا سيدى بين السياسة والقوانين الوضعية ..

**المدعي:** السياسة هى التى تضع القوانين ..

**ام خيشة:** عليك بمراجعة السنهورى ومؤلفاته .. فقد تنجلى الامور امامك .. وان مانجلتش ادعكها بليفه سلك ..

**المدعي:** أحتج ..

**المهرج:** سيب الست تتكلم ..

**القرمان:** الكلام ده انا سمعته فى السيمما .. فيلم ايه موش فاكر .. تقريبا الاكتع والسيف ..

**القاضى:** (لام خيشة) كملى كلامك وخللصينا ..

**ام خيشة:** وحسبى فى الدلالة على رؤيتى الموضوعية للأمور .. ان

اللص فى كثير من الاحيان قد تكون بداية لصوصيته  
هى الحاجة .. والحاجة أم الاختراع .. لكن هل يمكن  
للمدعو بلاص ان يخترع أسما غير الذى صرف له  
بقوة القانون .. علما بان الاسماء موجودة كوجود  
الشمس والهواء .. الاسماء تملئ العالم يا سادة .. اذا  
فليس هناك ما يدعو إلى التفكير فيما يقال عنه انه  
سرقة .. وهذا ما دعى المدعو بلاص ان يقتبس اسما  
لابنه من بين تلك الاسماء .. وليس هناك حرج فى ان  
يتصادف ان يكون هذا الاسم هو اسم السيد شريف  
الاحرج .. وسؤال الان للسيد شريف **(ثم وهى توجهه  
بالسؤال الى شريف)** هل يا سيد شريف .. هل اسمك  
فى الواقع يعتبر اسم على مسمى .. ام انه اسم مستعار  
تغطى به افعالك المريبة فى دنيا المال والأعمال ..  
والشاهد على ذلك بنوك بلاد بره اللى مسلك فيها  
الفلوس .. دولارات .. دولارات .. دولارات

**شريف :** **(فى تحد)** أنا احتج .. **(ثم للمحامى الذى ينظر الى  
ام خيشه فى البهار)** ما تتكلم يا اخويا ولا انا  
جايبك اتعايق بيك ..

**مهرى :** تصدق يا بيه انى مكيف ..

**شريف:** مكيف ؟ ..

**مهرى:** الوليه دى بتقول كلام زى الفل .. اطلع من نافوخي  
خلينع اسمع .. **(ثم الى أم خيشه)** ايه اللى بتقوليه  
ده يا ست .. يا عظمة على عظمة على عظمة ..

**المدعي:** وصلنا للعظمة يا عدالة المحكمة ..

**ام خيشة:** وفي ختام مرافعتي المتواضعة فاننى اطلب لموكلى ..  
جوزى اللى بيأكلنى ويكسينى وشقيان على وعلى  
عياله .. اطلب له البراءة واوعدكم ما عدناش نبص  
لفوق .. لان اللى ببص لفوق اليومين دول للاسف  
بيلاقى نفسه تحت زي ما يكون وقف في الممنوع  
وعمل صف تانى **(تبكى)** ..

**الجندي:** **(فجأة)** محكمة ..

**(القاعدة كلها فى صمت وترقب لشيء ما)**  
**والقاضى بنفسه ينظر حوله بحثا عن دخول احد**  
**كما يحدث فى دخول هيئة القضاء) ..**

**القاضى:** فيه ايه يا عسكري ؟ ..

**الجندي:** ابدأ يا حضرة القاضى ..

**القاضى:** امال مالك طلعت كده زى البتاع وقلت **(يقلده)**

محكمة ..

**الجندي:** موش عارف جت معايا كده ..

**القاضي:** طيب نظرا لانك خضيت المحكمة .. فقد قررنا

عزلك من عسكري الجندي وابقى شوف مين  
هير فعك تانى ..

**الجندي:** ابوس ايدك يا بك .. بلاش جندي دى مسألة صعبه

عشان كل الشباب بيجنندوهم وهايجنندوني من اول  
وجديد ..

**القاضي:** (غير مباليا) المدعى عاوز يقول حاجه ..

**المدعى:** ايوه (ثم بصوت هامش) الاقى نص جنيه سلف لحد  
ما نقبض ..

**القاضي:** انا موش عارف بتودى فلوسك فين .. ولا تكون  
بتتسرق ..

**القرمان:** (المدعى ينظر له نظرة ذات مغزى) الموظفين بالذات  
انا ما باجيش جنبيهم خالص ..

**القاضي:** (للقرمان) على بابا .. المهم دلوقت عاوزين نقول  
الحكم علشان كل واحد يروح لحاله (ثم للجندي)  
اتعصب ياللا وقولها ..

**الجندي:** (فى عصبية) محكمة ..

**القاضي:** حكمت المحكمة حضوريا باعدام المدعو بلاص ابن



زله ابن ماجور المدألج وتغريمه وتغريم ورشته بكل  
اتعاب القضية بما فيها النص جنیه السلف اللى  
هاندفعه وتعويض مالى قدره حوالى حاجه كتيره  
كده تسدد ديون البلد .. خلصت الجلسة ..

**ام خيشة:** (صارخة) بلاص ..

**بلاص:** ما تخافيش يا ام خيشه .. مشوار صغير وراجعلك .. ابقى  
حضرى الكوارع اللى نفسى فيها .. وورق الجرايد اللى  
هانسد بيه الشبابيك لما ننام بس بقولك ايه .. الجرايد  
تكون بالعربى علشان لو كان لى عمر اعرف  
اقراهالك .. ولو ما كنليش ابقى غطينى بيه وصوتى ..  
**الجندي:** محكمة ..

**بمبع:** الجنازة هاتكون زى ما اتفقنا يا بلاص .. كلها غلاية  
وشحاتين وأمن مركزى ..

**القاضى:** أمن مركزى ..

**بلاص:** الله موش هاتتحسب مظاهرة يا عم القاضى .. (ثم  
**لبمبع)** خللى بالك من العيال وامهم يا بمبع ..  
وشلضم كمان هو فين ؟ ..

**شلضم:** (والذى نفاجأة بوجوده بالخلف) موجود يا بلاص  
وقاعد أأيد كل حاجة ..

**بمبع:** يا حلاوة الصحبة الحلوة .. اللى لايمكن تتعوض ابدا  
يا جدعان ..

**المجندي:** محكمة ..

**شريف:** اخيرا كسبنا القضية ..

**مهري:** كسبنا القضية دى حكاية لكن انا عاوز اتعاب  
خمسة مليون جنيه ..

**شريف:** عنيه ليك . أول ما اطمئن انى هافك من البلد ..  
فلوسك هاتكون على الجزمة ..

**المجندي:** محكمة ..

**المهرج:** (للقاضى) انت خلاص حكمت صحيح ؟ ..

**القاضى:** (فى دهشة) حكمت صحيح .. هو الكلام موش  
كان قدامك يا بنى آدم ..

**القرصان:** الكلام كان قدامنا آه .. لكن احنا لينا رأى غير كده ..

**القاضى:** اذا احنا متفقين .. عمر الاختلاف فى الرأى ما فسد  
للود قضية ..

**المهرج:** لأ فسد .. ولازم القضية دى تعاد من الاول .. وكل  
واحد فينا يقول رأيه .

**الخامى:** (للقاضى) سيادة القاضى .. احنا كده هانتسوح ..

**المهرج:** التسويح يعم يا محامى ..

**القاضي:** انا اصدرت حكمي خلاص .. اللي زعلان من حاجة

يجي يقابلني الليله عند التابوت ونتكلم ..

**القرصان:** بس انا بكره فيه مركب مستنياني عشان شغلانه كده ..

**القاضي:** موش لازم الليله .. السنة الجاية ياسيدي .. احنا

موش مستعجلين .

**المجندي:** محكمة ..

**ام خيشة:** يا حضرة القاضي ..

**القاضي:** يا نعم ..

**ام خيشة:** خيشه مين هايرييه بعد ابوه ما يتعدم ؟ ..

**القاضي:** هو اول واحد هايتربي .. الايام والليالي والأرصفة

مدارسها كتير يا ستي .. والدولة موش ملاحقة على

فتحها ..

**بلاص:** البك القاضي كلامه مضبوط .. ودي خيشه يسرح

في الهرم وبكده نبقى ضمنا اننا دخلناه لغات ..

**المجندي:** (صارخا) محكمة ..

**(فجأة الكل يتجمد مكانه كالتماثيل عدا بلاص)**

**الذي يخرج من القفص ويفحصهم في دهشه) ..**

**بلاص:** نمتوا .. هي الحكاية كانت حلم ولا الحلم كان حكاية ..

منعول أبو ده حلم .. حلم غبي قدر واطى زى ما قال البك

الحامى الى المحكمة موكله .. موكله ايه موش عارف بس  
الحلم ده ساعات بيحصل .. بيحصل لكن فى صورة  
تانيه .. صورة لازم نصحى لها لبعدين تروح علينا نومه  
والغلابة تتاخذ فى الرجلين .. المسألة يا خواننا دلوقت  
واقفة عند كلمة لو .. لو الحلم ده حصل بالفعل ..  
هايجرى ايه ؟ .. **(ثم وهو يغير لهجته)** طيب نقولها  
بشكل جايز تعرفوه .. لو الاسامى كانت بفلوس .. كان  
الفقير سمى ابنه ايه ؟ .. **(ثم لحظة صمت لسماع  
المجهور)** لا جاموس .. الجاموس رغم انه حيوان مسكين  
مالوش مطالب .. لكن بيفيد .. يوم ناخذ منه اللبن ..  
ويوم ناخذ منه اللحم .. وبقية الايام بنغمى عنيه لاجل  
مايجر فى ساقيه عمرها ابدًا ما تقف طول ما فيه المفيد  
والمستفيد .. ثم وهو يشير لهجة الحمة النائمة ياريت  
تقلقوهم عشان يصحوا والعرض يخلص وتروحوا .. **(ثم  
وهو يستعد للتصفيق بكلتا يديه)** .. ياللا ..  
**(تضاء الصالة بكاملها لنهاية العرض مع اسدال  
ستار النهاية)**

## الكاتب

### \* ملوح فهمي

- خريج كلية التجارة في إدارة الأعمال .
- حصل علي الدراسات العامة والتخصصية في السيناريو من المعهد العالي للسينما .
- يعمل كاتباً للدراما السينمائية والتليفزيونية والمسرحية .
- عضو بإتحاد الكتاب ونقابة المهن السينمائية وجمعية كتاب ومؤلفي السيناريو وجمعية كتاب ونقاد السينما والجمعية الأفرو آسيوية للفنون والثقافة .
- قدم العديد من الأعمال الفنية منها : المشهد الأخير - جماد من لحم - شهادة ميلاد - بعد الرحيل - العميل رقم ١٣ - دمعة علي خد القمر - نساء لا تعرف الندم - وحوش اليقه - نداء عاجل - جمعه وبطاقاته الشخصية - الماسات الخضراء - وما زال الزواج مستمرا - لهيب الدم ... وغيرها .
- كرمت بعض أعماله الفنية كبعد الرحيل وجماد من لحم

في الكثير من التلفزيونات والمحطات العربية، كما كرم عمله للخيال العلمي (الماسات الخضراء) من جمعية كتاب ومؤلفي السيناريو.

صدر له دراسة عمليه عن العلاقات العامة وفنون الممارسة) ومسرحية (حاصروا المنطقة) والمسرحية التي بين يد القارئ الآن، وتحت الطبع مجموعته القصصية الجديدة بعنوان (جنس آدم).

### للنشر فى السلسلة :

- \* يتقدم الكاتب بنسختين من الكتاب على أن يكون مكتوباً على الكمبيوتر أو الآلة الكاتبة أو بخط واضح مقروء .
- ويفضل أن يرفق معه أسطوانة ( C.D ) أو ديسك مسجلاً عليه العمل إن أمكن .
- \* يقدم الكاتب أو المحقق أو المترجم سيرة ذاتية مختصرة تضم بياناته الشخصية وأعماله المطبوعة .
- \* السلسلة غير ملزمة برد النسخ المقدمة إليها سواء طُبِع الكتاب أم لم يطبع .

## صدر مؤخراً فى سلسلة

### نصوص مسرحية

- 105- قول يارب ..... صلاح عبد السيد
- 106- رابعة العدوية ..... د. نادية البنهاوى
- 107- الأفاعى أولاد الأفاعى ..... د. حمادة إبراهيم
- 108- عشية انتخاب أبى سفيان ..... رأفت السنوسى
- 109- حكايا لم تروها شهر زاد ..... علاء عبد العزيز سليمان
- 110- بلد راكبها عفريت ..... محمود القلينى
- 111- ثنائية الحلم والسقوط ..... محمد سيد عمار
- 112- كوابيس ليلة دخله ..... رأفت الدويرى
- 113- حدث عند الهرم ..... د. عادل معاطى
- 114- عركة ساندى بشندى ..... عبد المقصود محمد
- 115- بولاق الجديدة ..... د. مدحت الجيار
- 116- المداولة بعد الحكم أحياناً ..... ممدوح فهمى